

清史綱要三集

榮玉讓讀



清史綱要

三

清史綱要卷之五

雍正元年癸卯。正月辛巳。頒諭旨十一道。訓飭督撫提鎮以下。飭督撫提鎮以下。甲辰。封淳郡王允祐子弘曙爲長子。貝子允禩子弘春爲貝子。大學士王揆以老病乞休。允之。

禁侍衛官員等私在諸王門下行走。

二月辛亥。命張鵬翮爲文華殿大學士。

命甄別翰林詹事官。不安本分者。勒令解退回籍。

副將軍阿喇衲奏報。羅卜腦兒回人古班爾等。率領哈喇庫爾薩達克圖哈喇和邵三處戶口一千餘人。輸誠投順。

三月甲申。撤西藏駐防官軍及西寧八旗兵。設戍於察木多。

追封皇后父費揚古爲一等公。其子孫承襲一等侯。

封川陝總督年羹堯爲三等公。

丁卯。尊聖祖仁皇帝陵曰景陵。

吏部遵旨議覆直省督撫兼銜。查川陝總督統理西安甘肅四川三處事務。控制番羌。兩江總督統理江蘇安徽江西三處事務。地連江海。俱應授爲兵部尙書。兼都察院右都御史。其餘總督及各省巡撫。仍照舊例。由各部侍郎及別項官員補授總督者。俱改爲兵部右侍郎。兼都察院右副都御史。由侍郎補授巡撫者。亦改爲兵部右侍郎。兼都察院右副都御史。由學士副都御史及卿員布政使補授巡撫者。俱授爲右副都御史。由左僉都御史補授巡撫者。改爲右僉都御史。永爲定例。從之。

四月。復日講起居注官。

丁卯。帝初御乾清宮聽政。

戊辰。除山西陝西教坊樂籍。改業爲良民。

命奉旨速議事件。限五日覆奏。

移理郡王弘哲居鄭家莊。去京師二十里。

封十七阿哥允禮爲果郡王。

五月辛丑。仁壽皇太后崩。

六月。加封孔子先世俱爲王爵。

七月。雲南巡撫楊名時奏。巡撫衙門規禮共有五萬餘兩。准留若干。其餘應充公用。諭督撫羨餘。豈可限以科則。拘以繩墨。惟視秉心何如耳。固不可朘削以困民。亦不必矯激以沽譽。若一切公用犒賞之需。至於拮据窘乏。殊失封疆之體。非朕意也。必使兵民溫飽。官弁豐足。督撫司道亦皆饒裕。乃朕之所願。是在爾等接情度理而行之。

壬寅。以隆科多王頊齡爲明史監修官。徐元夢張廷玉朱軾覺羅逢泰爲總裁官。命於湖南地方建立試院。每科另簡考官。

命尙書侍郎等官。每日一人輪班奏事。密摺封進。

八月。兵部議覆巡視臺灣御史吳達禮奏。諸羅縣北半線地方。民番雜處。請多設知縣一。典史一。其淡水係要口。形勢遼闊。請增設捕盜同知一。應如所請。定諸羅分設縣曰彰化。

禁官民人等服用五爪龍紗緞。

諭朕諸子尙幼。建儲之事。此時未可舉行。然不得不預爲之計。今特將此事親寫密封。藏於匣內。置之乾清宮正中正大光明匾額之後。乃宮中最高之處。以備不虞。諸王大臣咸宜知之。

九月己丑。常壽奏羅卜藏丹津攻察罕丹津。已渡黃河。命年羹堯備兵擒剿。先是。帝遣侍郎常壽往問羅卜藏丹津所行情事。後經常壽奏。於七月二十二日抵親王羅卜藏丹津駐牧之沙拉圖地方。恭宣諭旨。令伊兄弟罷兵和睦。羅卜藏丹津訴言。戴青和碩齊察罕丹津額爾得尼厄爾克托克柰。欲霸占招地。擬起程渡河。與決勝負。臣察其情形。勢難和好。帝命行在總理事務王大臣詳議具奏。旋總

理大臣等議奏。羅卜藏丹津久懷異志。糾衆盟誓。皇上念伊祖顧實汗恭謙敬順。不卽加罪。特遣侍郎常壽前往和解。羅卜藏丹津不聽。殊屬悖逆。應調西寧兵。俟羅卜藏丹津渡河時。於渡口邀截。故有是命。

命纂修律例。

除紹興府惰民丐籍。

十月戊申。川陝總督年羹堯奏。羅卜藏丹津恣肆猖狂。臣領兵於九月二十日。自甘州起程。十月初至西寧。帝命年羹堯相機行事。授爲撫遠大將軍。改貝勒延信爲平逆將軍。

羅卜藏丹津執侍郎常壽於堪布廟。筆帖式多爾濟死之。

十一月丁丑。賜于振等二百四十六人進士及第出身有差。

十二月壬戌。宗人府奏。履郡王允禩。受皇上深恩。不敬謹辦事。每思推諉。應革去郡王。降授輔國公。得旨。允禩自受封以來。並不感激効力。著革去郡王。仍在原固

山貝子上行走。

禮部議覆浙閩總督覺羅滿保奏。西洋人在各省起蓋天主堂。潛住行教。人心漸被煽惑。請將各省西洋人。除送京効力外。餘俱安插澳門。應如所請。天主堂改爲公所。誤入其教者。嚴行禁飭。帝以西洋人在各省居住年久。今該督奏請搬移。恐地方之人。妄行擾累。命行文各省督撫。伊等搬移時。或給與半年數月之限。其來京與安插澳門者。委官沿途照看。毋使勞苦。

丁卯。冊立妃那拉氏爲皇后。

雍正二年甲辰。正月。年羹堯奏。十二月十三日。羅卜藏丹津送侍郎常壽回營。並呈奏章一函。筆帖式多爾濟被賊掠去。仗義捐軀。請施恩優卹。以示鼓勵。帝命常壽拏解西安監禁。多爾濟交部照殉節例議敘。

癸卯。廣東巡撫年希堯奏。盤查藩庫。用巡撫封條封貯。但新收錢糧。多寡未悉。請另設一庫。委道員一員。兼同藩司察視收支。得旨。朝廷設官。各有職掌。巡撫乃朕

任用之人藩司亦朕所簡用者。理應協恭辦理。況撫藩同在一城。儻有虧空。何難覺察。年希堯欲令道員監察藩庫。向來道員倉庫。藩司有盤查之責。今反欲自下察上。殊屬倒置。原本發回。嚴加飭行。

二月丙午。帝以聖祖仁皇帝御製上諭十六條。頒行日久。慮民或怠。乃復尋繹其義。推衍其文。共得萬言。名曰聖諭廣訓。並製序文。刊刻成編。頒行天下。

諭八旗文武官員人等。我國家念爾等祖父。皆係從龍舊臣。著有勳績。故加恩後裔。量才授官。冀收心膂驅策之效。爾等自當恪守官箴。勤勞王事。庶幾上以仰報君恩。下以顯揚世美。乃每見旗員居官。不能悉體朝廷期望之意。賢否雜出。志行不齊。筮仕之初。輒謂旗人與漢人不同。漢人無累。可以涇涇自守。旗人則本旗官屬。需索多端。親族往來。責望甚衆。萬一任滿。又不免有當差之累。此念一起。百弊叢生。不以忠君體國爲心。不以曠職殃民爲懼。潛通賄賂。恣意苞苴。殊不思國家察吏廉者獎。貪者懲。滿與漢無二法也。爾等果能潔己奉公。始終一節。休聲丕著。

善政日聞。朕自當從優擢用。以示獎勵。凡所過慮。皆可不必。如其不然。則法網難寬。縱家擁厚賞。安能坐享乎。至於爾等家世武功。業在騎射。近多慕爲文職。漸致武備廢弛。而由文途進身者。又止傲倖成名。不能苦心向學。平居積習。尤以奢侈相尚。居室器用。衣服飲饌。無不備極紛華。爭誇靡麗。甚者沈湎梨園。遨遊博肆。朕特加諄諭。自此以後。出仕者各宜精白乃心。人人以廉能自矢。不得藉旗人多累之說。以遂其罔上行私之術。八旗子弟。各習其業。文則潛心制義。博覽詩書。武則嫻習弓馬。講究韜略。且各崇儉戒奢。安分循禮。爾等八旗皆佐命後昆。深願克紹前修。榮名悠遠。國家亦重有賴焉。其各欽承。毋忽。

三月。年羹堯奏擒獲羅卜藏丹津之母阿爾太喀屯。及其妹夫克勒克濟農藏巴吉查等。並男女牛羊無數。二十二日至柴旦木。羅卜藏丹津帶二百餘人逃竄潛匿。青海部落悉平。詔授年羹堯爲一等公。再賞一精奇尼哈番。授岳鍾琪爲三等公。旋封年羹堯之父年遐齡爲一等公。加太傅銜。賜緞九十四。

革郡王允祿爵。永遠拘禁。因其奉使口外不肯前往故也。

閏四月丁丑。命續纂大清會典。

命左右兩翼各立宗學一所。揀選宗室四人爲正教長。十六人爲副教長。宗室子弟願入學者。分別教習清漢書。讀書之暇。演習騎射。並日給銀米紙筆等項。

癸未。命各省督撫。轉飭有司。於通都大邑。人煙稠密之區。照京師例。設普濟堂。以養老疾無依之人。

甲申。兵部等衙門議覆條奏內改併各衛所歸於州縣管轄一條。查得各處軍民戶役不同。未便歸併。且武官科甲出身人員。專選衛所守備千總。若盡裁衛所。必致選法壅滯。應無庸議。得旨。此事部議所見甚小。滇蜀兩省。曾經裁減衛所。未聞不便。今除邊衛無州縣可歸。與漕運之衛所。各有繇役。仍舊分隸外。其餘內地所有衛所。悉令歸併州縣。飭令直省督撫。分別區畫。

乙酉。諭州縣有虧空錢糧。百姓情願代賠者。此端斷不可開。虧空之員。未必愛民。

況百姓貧富不等。斷無闔縣情願代賠之理。或係棍蠹勾連。借端科斂。或不肖紳衿。一向出入衙門。通同作弊。及本官被參。猶冀題留復任。因而號召多事之人。連名具呈。稱係闔縣願賠。後官畏懼承追處分。接呈入手。卽差役按里追呼。名曰樂捐。其實強派。嗣後紳衿富民情願協助者。聽其自行完納。其有闔縣具呈者。卽將爲首之人。治以重罪。

五月庚申。諭總理王大臣。外省文武大臣。凡陛見來京。不必進獻一切物件。嗣後著永行禁止。

革貝子弘春爵。

六月。命吏部尙書田從典協理大學士。

戶部議覆戶部侍郎塞德奏請設立井田。查內務府餘地一千六百餘頃。入官地二千六百餘頃。應於此內擇二百餘頃。爲井田。將八旗無產業人內。自十六歲以上六十歲以下者。派往耕種。滿洲五十戶。蒙古十戶。漢軍四十戶。共一百戶。各受

田百畝。周圍八分爲私田。中間百畝爲公田。共力同養公田。俟三年後。所種公田之穀。再行徵取。於革職大員內。揀選二人。勸教管理。三年。分別議敘。每年十月後。農事旣畢。校圍學射。並令戶部派員往視。設立村莊。蓋造土房四百間。計口分給。其耕種之人。每名給銀五十兩。以爲置辦種粒牛具農器之用。其井田地畝。儻有旗民交錯之地。請將附近良田照數給換。從之。

七月。命郡王允禩往守景陵。

諭兵部。嗣後文官在軍前効力者。卽著兵部議敘。永著爲例。

御製朋黨論。頒賜羣臣。

八月甲戌。命凡官員入闈者。其子弟著一體應試。將試卷另封進呈。派大臣校閱。停差巡視湖河御史。

己丑。諭吏部。國家分理庶績。務在得人。著於各省道府同通州縣等官內。總督保奏三員。巡撫保奏二員。布政使按察使各保奏一員。將軍提督亦屬本省大員。將

所知亦令保奏一員。俱各密封保奏。不得會同商酌。如保奏不當。日後劣蹟敗露。將保奏上司一併治罪。

禁武弁私役兵丁。

九月辛丑。以西邊軍務將已告竣。命將捐納各項事例。即行停止。

甲寅。命山西丁銀。攤入田畝徵收。

十月戊寅。封前明後裔正定府知府朱之璉為一等侯。

賜陳惠華等二百九十九人進士及第出身有差。

乙未。理藩院議覆厄魯特郡王額駙阿寶呈稱。請於青海處賜閒曠之地居住。管理青海人等。不致復萌亂心等語。查阿寶之父巴圖爾額爾克濟農和洛里。自青海來歸。封為貝勒。阿寶承襲後。於平定西藏有功。封為郡王。應如所請。見有貝子丹忠所居之地。甚為寬大。即令阿寶駐牧。並令大將軍年羹堯。派員齎餉。助其移徙安插。從之。

十一月嚴禁兵民等出殯時前列諸戲。及前一日聚集親友設筵演戲。

諭刑部於滿漢編修檢討庶吉士內揀選有情願在刑部學習辦事者。或有爲爾等所知。共揀選二三十員。帶領引見。分在各司學習。辦事明白。實心效力者。酌量題補。

十二月戊寅。諭吏部直隸守道。職司通省錢穀。巡道職司通省刑名。卽如各省之有藩臬二司。今若概與道員一體。不加分別。似未允協。蓋向以畿輔重地。不立布政按察名色。朕思畿輔與各省有何區別。今應更改畫一。將守道改爲布政使。巡道改爲按察使。

癸未。二阿哥允祜卒。追封爲和碩理親王。諡曰密。

戊子。遣散秩大臣覺羅舒魯。翰林院學士阿克敦。賜祭故朝鮮國王李昫諡恪恭。封朝鮮國王世弟李吟爲朝鮮國王。

雍正三年乙巳。正月乙巳。遣官於直隸固安縣。擇官地二百頃爲井田。命八旗無

產之人受耕。

四川巡撫蔡珽威逼所屬知府蔣興仁自盡。刑部擬斬。特旨因其爲年羹堯所參。從寬免罪。旋授爲左都御史。

理藩院議奏。張家口外入官地畝。請照邊地例。定爲三等起科。每犁一具。徵銀四兩二錢。得旨。民人交納維艱。不得催科太迫。如不能足四兩二錢之數。著再量減二錢。

吏部奏請差湖南山東學政。得旨。從前學政主考。皆就其爲人謹慎者派往。並未考試。其中並有不能衡文者。或因中式之後。荒疏年久故耳。著將應差之翰林。並進士出身之各部院官員查奏。俟朕試以文藝。再行差委。

丁卯。浙閩總督滿保奏。臺灣陳阿難益難等六社生番歸化。每歲照例以鹿皮代稅。下部知之。

戊辰。欽天監奏。本年二月初二日庚午。日月合璧。五星聯珠。請敕付史館。從之。

二月辛未。停止竊賊逃人等割脚筋例。

撤總理事務大臣。命各歸職守。

辛卯。予故文華殿大學士張鵬翮諡文端。禮部尙書張伯行諡清恪。

削鄂倫岱公爵。發往奉天居住。因其黨於廉親王允禩也。

三月丁未。策安阿喇布坦遣使進表。貢獻万物。賞賚如例。

設安徽提督學政。

丙辰。允朱軾請。修浙江杭州等府江南華亭等縣海塘。捍禦潮汐。

從管理戶部事務怡親王請。酌減蘇松浮糧。

浙閩總督滿保奏。臺灣山後七十四社生番歸化。

敕輔政功。怡親王允祥賞一郡王。聽王於諸子中指名奏請授封。隆科多賞給世襲一等阿達哈哈番。馬齊賞給拜他喇布勒哈番。獨廉親王允禩以有過不敕。尋以怡親王具摺固辭。允之。

通史綱要 卷五
四月。調年羹堯爲杭州將軍。其川陝總督印務。以甘肅提督岳鍾琪署理。其撫遠大將軍印。命齎送來京。

辛卯。命田從典爲文華殿大學士。兼吏部尙書。

五月。臺灣生番巴老遠等四社猫仔等十九社歸化。

六月癸酉。革年羹堯之子年富年興職。交伊祖年遐齡。儻仍不悛改。卽行正法。

己卯。命潛邸曰雍和宮。

命御門聽政日。派翰林院編修檢討四員侍班。

甲午。削年羹堯太保職銜。

七月。削隆科多太保職銜。

壬子。白潢以病免。命高其位爲文淵閣大學士。兼禮部尙書。以戶部尙書張廷玉

署大學士事。

革年羹堯杭州將軍任。授爲閒散章京。在杭州效力行走。

革貝子允禛爵。因其縱容屬下騷擾地方毆打人民也。

八月乙亥。武英殿大學士王頊齡卒。賜諡文恭。頊齡與弟鴻緒九齡。俱以文章知名。

九月甲寅。命吏部尙書朱軾爲文華殿大學士。仍管吏部尙書事。

十月壬辰。添設稽查盛京御史一員。清查五部及將軍衙門事件。每一年派換。

十二月丁卯。降郡王允禴爲固山貝子。因其前爲大將軍時。任意妄爲。苦累兵丁。侵擾地方。軍需帑銀。徇情糜費也。

甲戌。議政大臣等奏。年羹堯反逆不道。欺罔貪殘。罪迹昭彰。彈章交至。謹將其罪案列款陳之。凡大逆之罪五。欺罔之罪九。僭越之罪十六。專擅之罪六。貪黷之罪十八。侵蝕之罪十五。殘忍之罪四。凡九十二大罪。請立正典刑。以彰國法。奉旨。著交步軍統領阿齊圖。令其自裁。其父年遐齡。兄年希堯。革職免罪。其子年富立斬。其餘十五歲以上之子。發往廣西雲貴極邊煙瘴之地充軍。族中有候補文武官。

者俱革職。其嫡親子孫將來長至十五歲者。皆陸續照例發遣。永不赦回。亦不許爲官。有匿養年羹堯子孫者。以黨附叛逆例治罪。

辛巳。刑部等衙門議奏。妄作西征隨筆之汪景祺。照大不敬律擬斬立決。得旨。汪景祺作詩譏訕聖祖仁皇帝。大逆不道。應當處以極刑。著立斬梟示。其妻子發往黑龍江。給與窮披甲之人爲奴。其期服之親兄弟親姪。俱著革職。發遣寧古塔。其五族以內之族人。見任及候選候補者。俱查出一一革職。令伊本籍地方官約束。不許出境。

怡親王等陳奏直隸水利營田事宜三款。一白衛淀地等河情形。並繪圖進呈。一請於灤薊等處各設營田。一請揀選河員。得旨。直隸地方。向來旱澇無備。皆因水利未興所致。朕宵旰軫念。特命怡親王及大學士朱軾前往查勘。今據查勘繪圖陳奏。所議甚爲明晰。以從來未有之工程。照此措置。似乎可收實效。著九卿速議具奏。

庚寅。禮部等衙門遵旨議覆。先師孔子聖諱。理應迴避。惟祭天於圓丘。丘字不用迴避外。凡係姓氏。俱加偏旁爲邱字。如係地名。則改爲他名。得旨。除四書五經外。凡遇此字。並川邱字。地名亦不必改。而但加偏旁。讀作期音。

戶部等衙門遵旨議准。直隸河防水利事宜。據和碩怡親王等疏言。直隸之衛河。淀河。子牙河。永定河。皆匯於天津之大直沽入海。此直隸水道之大略也。衛河與汶河合流東下。德棣倉景以下。春多淺阻。一遇伏秋暴漲。不免潰溢。請將滄州南之磚河。青縣南之興濟河。故道疏濬。於舊時建閘之處。築減水壩。以洩衛河之漲。靜海縣權家口。亦築壩減水。白塘口入海之處。並開直河一道。使磚河興濟河之委。同歸白塘出口。修理海口舊閘。以時啟閉。則滄瀛以北。水利興而水患除矣。東西二淀。跨雄霸等十餘州縣。均應疏濬深廣。並多開引河。使諸淀脈絡相通。其已淤爲田畝者。四面開渠。中穿溝洫。庶圩田旱澇有備。其趙北苑家二口。爲東西二淀咽喉。趙北口隄長七里。板石橋共八座。俱應升高加闊。苑家口北之中亭河。上

流之玉帶河。對岸爲十望河。均應開通。庶東西二淀。無衝決之患矣。子牙河爲滹漳下流。清濁二漳發源山西。經廣平正定。而滹沱溢陽大陸之水會焉。其下流有清河夾河月河。皆分子牙之流。同趨於淀。宜開決分注。以緩子牙河奔放之勢。永定河俗名渾河。水濁泥多。故道遂湮。應自柳叉口引之稍北。繞王慶沱之東北入淀。兩河淀內之隄。至三角淀而止。爲衆淀之歸宿。應照舊開通。逐年疏濬。兩河之濁流。自不能爲患矣。至各處隄防衝潰甚多。均應疏濬修築。再請於京東之灤薊天津。京南之文霸任邱新雄等處。各設營田專官。經畫疆理。召募老農。勸導耕種。民力不辦者。動支正項錢糧。代爲經理。田熟。歲收十分之一。以補庫帑。足額而止。營田一頃以上者。分別獎賞。有能出貲代營者。民則優旌。官則議敘。至各屬官田。約數萬頃。請遣官首先舉行。爲農倡率。民間田廬有礙水道者。計畝撥抵。視其畝數。加十之二三。河淀淤地。必須挖掘者。將附近官地。照數撥抵。則營田水利。人皆趨事樂從矣。從之。

雍正四年丙午。正月戊戌。帝召貝勒貝子公滿漢文武大臣等。諭以廉親王允禩。希冀非望。狂悖已極。情罪重大。宜削籍離宗。革去黃帶子。其黨允禔蘇努吳爾占。結黨搆逆。亦將黃帶子革去。並令宗人府將允禩允禔蘇努吳爾占名字除去。己未。戶部等衙門。以制錢日少。請嚴立黃銅器皿之禁。紅白銅器仍照常行用。其黃銅所鑄。除樂器軍器天平法馬戩子及五斤以下之圓鏡不禁外。其餘不論大小器物。俱不得用黃銅鑄造。其已成者。俱作廢銅交官。估價給值。儻再有製造者。照違例造禁物律治罪。

辛酉。命將允禩之妻革去福金。休回外家。嚴加看守。

二月癸酉。命貝子魯賓監禁高牆。因其諂媚允禩也。

命削允禩王爵。在宗人府看守。尋命圈禁高牆。

辛卯。命張廷玉爲文淵閣大學士。仍管戶部事。

三月丙申。先是宗人府奏允禩允禔蘇努吳爾占等。旣已削出宗籍。應將伊等本

身及其子孫更改舊名。旋允禩改名爲阿其那。伊子弘旺改名爲菩薩保。允禔改名塞思黑。旋塞思黑於八月。阿其那於九月。先後病故。

革食侍講俸錢名世職銜。御書名教罪人四字。令地方官製造匾額。張掛所居之宅。以其作詩投贈年羹堯。備極諂媚故也。

四月戊辰。吏部疏奏。京察屆期。請派大學士尙書等大臣。會同考察。得旨。嗣後遇京察之年。著內閣滿漢大學士吏部都察院吏科河南道。共同閱看。著爲例。不必另派大臣。

命雲南通省丁銀。攤入田畝內徵收。

五月癸巳。諸王大臣等奏。允禩身爲大將軍。毫不效力。止圖利己營私。縱容屬下。騷擾地方。嚇詐官員。固結黨羽。心懷悖亂。請卽正典刑。以彰國法。允禩初於馬蘭峪居住。得旨。令撤回禁錮壽皇殿。其黨鄂倫岱阿爾松阿俱坐死。

六月庚午。諭刑部。緝拏賭博當場所獲銀錢。不必入官。卽賞給拏獲之人。以示鼓

勵嗣後永爲定例。

七月。革平郡王訥爾素爵。在家圈禁。以宗人府奏其在西寧軍前貪婪受賄故也。
八月。署理大學士事務徐元夢。因繙譯本章錯誤。革職。在內閣學士之列。辦理票
籤本章一切繙譯事務。效力行走。

九月。禮部侍郎查嗣庭。以所作日記有悖亂語。革職。拏問。交三法司嚴審定擬。旋
嗣庭在獄病故。仍戮尸梟示。其子坐死。家屬流放。

十月。帝以浙省風俗澆漓。特授光祿寺卿王國棟爲浙江觀風整俗使。並停浙江
鄉會試。因以文字獲罪之汪景祺查嗣庭。皆浙人也。

命將裕親王廣寧交宗人府永遠鎖禁。

十一月乙未。靖邊將軍富寧安自軍營回京。奉旨封三等侯爵世襲。

大學士高其位以老疾乞休。准以原官致仕。

十二月辛酉。命河南丁銀攤入地糧內徵收。

甲子。御史謝濟世參奏河南巡撫田文鏡營私負國貪虐不法十罪。帝以田文鏡秉公持正。實心辦事。爲天下督撫中所罕見。命革濟世職。發往阿爾泰軍前效力贖罪。

壬申。雲貴總督鄂爾泰奏。剿辦黔省兇苗。攻破三十六寨。投誠二十一寨。招撫苗民五百餘戶。三千餘口。又查出熟田五千八百餘畝。熟地一萬四千五百餘畝。荒地九千六百餘畝。奉旨交部從優議敘。

雍正五年丁未。正月。命兵部尙書孫柱署大學士事。

高其位卒。予諡文恪。

內閣太常寺卿鄒汝魯進河清頌。內有舊染維新風移俗易語。帝不悅。交九卿公同嚴審。定擬具奏。尋刑部請照律擬絞立決。得旨著革職從寬免死。發往湖廣荊州府沿江隄岸工程處效力。

二月。加福建興泉道巡海道銜。移駐廈門。改臺廈道爲臺灣道。

三月。以本年閏月節氣稍遲。二月尙寒。改三月會試。後遂爲例。

福建總督高其倬奏。閩省福興漳泉汀五府。地狹人稠。自平定臺灣以來。生齒日增。本地所產。不敷食用。請復開洋禁。以惠商民。並令出洋之船。酌量帶米回閩。從之。

命八旗每佐領添設副領一。協同辦事。

丙子。俄羅斯察罕遣使召薩瓦來。

命吏部將會試舉人揀選引見。並問九卿將所知者舉出。再舉人內有同鄉素日推服之人。亦著舉人公舉。或數人公舉一人。或十數人公舉一人。俱將姓名註冊。務須有爲有守之人。方可推薦。不可冒濫。

甲寅。命江西丁銀攤入地畝徵收。

閏三月。諭州縣侵挪之弊。官固主之。而經承自無不知。乃不行稟阻。且從而慫恿之。以便分肥。迨本官監追。而經承且逍遙事外。此後本官少有虧空。該吏不行稟

阻。致本官以虧空糾參。即將經承一同監追。減本官一等治罪。

兵部議覆。浙江武舉會試。應照文舉人例停止。帝以士習澆漓。不干武途。況浙省文有餘而武不足。毫無不便之處。命武科照舊會試。

辛巳。宗人府議奏輔國公阿布蘭。擅將玉牒底本。私交隆科多。應革去公爵。嚴行圈禁。帝命將阿布蘭革去輔國公。在伊家圈禁。

四月己丑。吏部遵旨將會試下第舉人。挑選各省教職。

壬辰。申禁黃銅器皿。

辛卯。賜彭啓豐等二百二十六人進士及第出身有差。

雲貴總督鄂爾泰奏。鎮沅府猓夷。於七月十七夜。縱火肆掠。威遠同知署。鎮沅府知府劉洪度被害。隨調元江協副將張應宗等。領兵前往。陸續獲首要刀如珍等五十餘人。賊黨百餘。招回夷民三千餘戶。

癸丑。諭內閣。山西之樂戶。浙江之惰民。皆除其賤籍。使為良民。近聞江南徽州府

則有伴僮。寧國府則有世僕。本地呼爲細民。幾與樂戶。惰民相等。又其甚者。如二姓。丁戶。村莊相等。而此姓乃係彼姓伴僮世僕。凡彼姓有婚喪之事。此姓卽往服役。稍有不合。加以箠楚。及訊其僕役起自何時。則皆茫然無考。非有上下之分。不過相沿惡習耳。著該督查明定議具奏。尋禮部議准。安慶巡撫魏廷珍遵旨議奏。江南徽寧等處。向有伴僮世僕名色。請嗣後紳衿之家。典買奴僕。有文契可考。未經贖身者。本身及子孫。俱聽從伊主役使。至年代久遠。文契無存。不受主家參養者。概不得以世僕名之。永行嚴禁。從之。

六月。議政王大臣議奏。隆科多私抄玉牒。存貯家中。及降旨詢問。又不據實具奏。應俟辦完鄂羅斯疆界事件。將伊革職拏問。得旨。可將隆科多調回。令其速來。其鄂羅斯邊疆等事。著克什圖前往。與四格圖理琛辦理。旋革隆科多爵。以其弟慶復襲一等公。

七月。西藏噶隆扎薩克台吉頗羅鼐等奏。阿爾布巴隆布柰扎爾鼐等。會同前藏

頭目。於六月十八日。將康濟肅殺害。臣卽收聚後藏軍兵。防守駐紮。阿爾布巴等。復發兵來攻。被臣殺傷無算。今臣帶領兵衆。剿捕阿爾布巴等。

八月。封故都統賴塔爲一等公。令其孫博爾屯承襲。敘克復雲南功也。

乙巳。議政王大臣等議。覆額駙策凌等奏。與俄羅斯使臣薩瓦相見。議定疆界事宜。與伯四格圖理琛等。以應立界石地方。繕寫給與薩瓦薩瓦及布里雅吳梁海等。稱已心服。俟其回時。卽將界址山河地名。繕寫繪圖。恭呈御覽。應照策凌等所議。立石定界。曉諭喀爾喀汗王各扎薩克黑龍江將軍等。令其約束屬人。不得越界生事。從之。

九月。命孫柱爲文淵閣大學士。

戊寅。刑部疏參奉天府尹蔡珽。罪案山積。所列凡十八款。均干大辟。應斬立決。妻孥入辛者庫。財產入官。帝命從寬。改爲斬監候。秋後處決。餘依議。

十月甲申。川陝總督岳鍾琪奏。剿撫建昌冕山賊番事竣。苗疆底定。命交部議敘。

丁亥。順承郡王錫保等。遵旨審奏隆科多罪案。大不敬之罪五。欺罔之罪四。紊亂朝政之罪三。姦黨之罪六。不法之罪七。貪婪之罪十六。應擬斬立決。妻子入辛者庫。財產入官。帝召議政王大臣內閣九卿等諭曰。隆科多所犯四十一款。實不容誅。但皇考升遐之日。召朕之兄弟及隆科多入見。面降諭旨。以大統付朕。是大臣之內。承旨者。惟隆科多一人。今因罪誅戮。雖於國法允當。而朕心則有所不忍。隆科多免其正法。於暢春園外附近空地。造屋三間。永遠禁錮。其妻子亦免入辛者庫。伊子岳興阿著革職。玉柱著發往黑龍江當差。

戊子。諭吏部。臺灣遠隔重洋。向來學政交與臺灣道兼管。朕思道員管理地方之事。又兼學政。未免稍繁。應將學政交與派往巡察之漢御史管理。永著爲例。

戊戌。命文淵閣大學士張廷玉爲文華殿大學士。

諭內閣。各省鄉試房官。舊例皆用現任知縣入闈。朕思知縣身爲民牧。地方政務甚繁。入闈動經數月。諸事或致遲誤。朕意欲斟酌更定。於鄰省中舉人進士之在

家候選者。臨期調取數十人。交與監臨之督撫。秉公掣籤。令其入闈分校。著九卿悉心詳議具奏。

命各省總兵官。毋得進獻方物。

己酉。諭戶部。查各省之中。賦稅最多者。莫如江南之蘇松。浙江之嘉湖。每府多至數十萬兩。地方百姓。未免艱於輸將。其賦稅加重之由。始於明初。洪武時。四府之人。爲張士誠固守。故平定之後。籍諸富民之田。以爲官田。按私租爲稅額。夫負固之罪。在士誠一人。而乃歸咎百姓。加其租賦。此洪武之苛政也。有明二百餘年。減復不一。我朝定鼎以來。亦照明例徵收。蓋因陸續辦理軍需。經費所在。未便遽行裁減。我皇考聖祖仁皇帝常論及此。雍正三年。將蘇松二府額徵浮糧豁免。彼時頒發諭旨甚明。本欲一體加恩。嘉湖二府。因浙江風俗澆漓。正須化導。故爾暫止。今見浙俗漸次轉移。朕心深慰。查嘉興額徵銀四十七萬二千九百餘兩。湖州府額徵銀三十九萬九千九百餘兩。俱將減十分之一。二府共免銀八萬七千二百

兩有奇。永著爲例。

十一月癸丑。命四川陝西雲南。各遣兵進藏。以左都御史查郎阿副都統邁祿。經理一應軍務。

丁卯。還鰲拜一等公爵。給其孫達福承襲。世襲罔替。仍命致祭一次。

戊辰。雲貴總督鄂爾泰奏。黔省邊界生苗。不納糧賦。不受管轄。隨其自便。無所不爲。由來已久。臣自剿撫長寨後。生苗目睹長寨苗戶安居樂業。各思投誠內附。夷苗共一百八十四寨。一千八百餘戶。俱聞風嚮化。並獻弓弩盔甲。夷民半無姓氏。名字雷同。應行更定。彙冊報部。酌爲額賦。案年輸租。帝以鄂爾泰辦理甚屬可嘉。命由拜他喇布勒哈番加授一等阿達哈哈番世職。

十二月。定各省六年選拔一次。國子監屆期題請候旨。

諸王大臣等審奏延信罪狀二十款。請按律斬決。帝命從寬免死。著與隆科多在

一處監禁。

戶部議准署兩江總督范時繹奏。丁隨糧辦。最爲均平良法。請以雍正六年爲始。將江蘇安徽各州縣應徵丁銀。均攤入地畝內徵收。從之。

左都御史沈近思卒。予諡端恪。近思之學。平正切實。篤信平湖陸清獻公。以上宗朱子。嘗做近思錄之例。薈萃諸說而類編之。凡十有四卷。曰陸子遺書。

雍正六年戊申正月。先是雍正三年四月。原任雲貴總督高其倬奏。安南國疆界。有內地舊境一百二十里。應加清理。於賭呪河立界。安南國王具奏陳請。帝命雲貴總督鄂爾泰清查。給還八十里。於鉛廠山下小河以內四十里立界。安南國王復激切陳訴。帝以鄂爾泰所奏鉛廠山下地方。山川形勢。中外截然。頒敕諭之。安南國王奉表陳謝。帝嘉其詞旨恭順。仍以四十里地賜之。

二月乙酉。戶部議覆四川巡撫憲德奏。越嶲衛官馬廠等處番民五百二十五戶。願入版圖。認納蕎糧一百四十一石。以充賦稅。應如所請。令其照數輸納。越嶲衛所就近撥充營汛兵餉。從之。

三月丁巳大學士田從典以老病乞休。允之。從典旋卒。予諡文端。

戊午。命蔣廷錫爲文淵閣大學士。兼戶部尙書。改文華殿大學士張廷玉爲保和殿大學士。

雲貴總督鄂爾泰奏。化導生苗木林工七等一百一十五寨內附。

四月丁未。帝以從前因公註誤之員。其中未必無才守可觀。命吏部行文各省。凡知府同知通判知州知縣。任內除大計特疏糾參外。其因公註誤降革者。該員曾經居官五年。而離任之後。交代清楚。無錢糧案件未清之處。准本人親赴吏部具呈。吏部不拘人數。卽行奏聞。考試履歷。帶領引見。候酌量起用。

五月。諭國家舉行大計。乃三年考績之大典。其中卓異人員。皆加以特恩。不次擢用。恐相沿日久。必有濫舉失實之弊。嗣後文武卓異官員。有犯貪贓不法之款。而審訊確實者。將從前列爲卓異之上司。一併議處。儻於該員未敗露之先。有能查出參奏者。免其處分。

以河南巡撫田文鏡善政爲直省第一。授爲河東總督。管理河南山東二省事務。後不爲例。

命領侍衛內大臣公馬爾賽在大學士內辦事。

六月己亥。宗人府議奏。誠親王允祉。身爲親王。惟利是視。將國家政事。置之度外。在御前喝責王大臣等。毫無臣禮。應革去王爵。禁錮私第。得旨。朕惟此一兄。免其褫爵拘禁。降封郡王。

七月壬申。予故武英殿大學士富寧安謚文恭。

川陝總督岳鍾琪奏。頗羅鼐率兵直抵西藏。各廟喇嘛將阿爾布巴隆布奈扎爾鼐等擒獻。

八月甲申。帝以引見大小臣工時。凡陳奏履歷。惟有福建廣東兩省之人。仍係鄉音。不可通曉。令兩省督撫。轉飭所屬各府州縣及教官。徧爲傳示。多方教導。務期語言明白。

命馬爾賽爲武英殿大學士。

九月丁未。諭內閣。浙江士習澆薄。朕爲人心世道計。不得不嚴加整理。今二年以來。李衛王國棟先後奏。兩浙士子感朕訓誨之恩。省愆悔過。可稱士風丕變。明年卽屆鄉試之期。浙省士子。准其照舊考試。

丁丑。差往西藏吏部尙書查郎阿等奏。臣等統領大兵。自五月初六日。由西寧出口。於八月初一至西藏。卽會同在藏駐紮之副都統馬喇學士僧格。將阿爾布巴隆布奈札爾鼐等審訊。據阿爾布巴等供。謀殺康濟鼐是實。臣等一面奏聞。一面將阿爾布巴等及事內應斬人犯。卽行正法。報聞。

十二月。始立咸安宮官學。將包衣佐領內管領之子弟。並景山官學生內。揀選穎秀者。入學肄業。

議政王大臣等。遵旨議覆辦理西藏事務。吏部尙書查郎阿等奏。頗羅鼐原在後藏。與唐古特相處日久。衆皆信服。應遵旨令頗羅鼐總管後藏事務。其前藏事務。

海史綱要卷五
亦令頗羅鼐暫行總管。俟達賴喇嘛遷移完畢。招地撤兵。再令頗羅鼐專管後藏。從之。

丁酉。封西藏扎薩克台吉頗羅鼐爲貝子。

雍正七年己酉。正月癸丑。帝以糧船過淮。所費陋規甚多。大爲漕政之弊。派御史二員。前往淮安。專司稽察之任。

丁巳。加恩年老大臣。禮部尙書陳元龍。左都御史尹泰。授爲額外大學士。

雲貴廣西總督鄂爾泰。奏卿雲見。加鄂爾泰三等阿思哈尼哈番。文武各官俱加級有差。

命陳元龍爲文淵閣大學士。兼禮部尙書。尹泰爲東閣大學士。兼兵部尙書。

二月。河道總督齊蘇勒卒。予諡勤恪。諭內閣。歷來河道總督。如靳輔。齊蘇勒二人。實能爲國宣勞。又安百姓。合於有功臣祀典之例。著尹繼善等就近相度地方。合建祠宇。有司春秋祭祀。

設福建觀風整俗使一。從禮部侍郎蔡世遠請也。

初羅卜藏丹津之敗。往投準噶爾策妄喇布坦。納之。帝命遣使索之。不奉詔。既而西師亦罷。雍正五年。策妄喇布坦死。子噶爾丹策零立。屢入犯。帝議討之。時大學士朱軾都御史沈近思。皆以爲天時人事未至。都統達福亦力言噶爾丹策零能用其舊臣。未可圖。惟大學士張廷玉力贊用兵。帝是之。

三月。以領侍衛內大臣三等公傅爾丹爲靖邊大將軍。出北路。川陝總督三等公岳鍾琪爲甯遠大將軍。出西路。往征準噶爾。

五月。命直省老農。改爲三年一舉。

初。御史謝濟世以劾奏田文鏡忤旨。發往軍前效力。至是。順承郡王福保復奏其註釋大學。毀謗程朱。帝閱其書。中多怨望毀謗之語。命九卿翰詹科道秉公議罪。尋議上。應正法。奉旨免死。令當苦差。效力贖罪。

先是。湖南人曾靜。遣其徒張熙。投書於川陝總督岳鍾琪。勸以同謀舉事。鍾琪以

聞詔刑部侍郎杭奕祿副都統海蘭至湖南會同巡撫王國棟拘提曾靜質訊。曾靜供稱。因應試州城得見呂留良評選時文。內有論夷夏之防。及井田封建等語。又與呂留良之徒嚴鴻逵沈在寬等往來投契等語。隨將會靜張熙提解來京。並命浙江總督李衛查呂留良嚴鴻逵沈在寬家藏書籍。所獲日記等書。並案內人犯。一併拏解赴部。命內閣九卿等先將會靜研訊。帝以呂留良之罪。尙在曾靜之上。諭將呂留良及見在子孫嫡親弟兄子姪。照何定例治罪之處。著九卿翰詹科道會議。各省督撫提督兩司。秉公各抒己見評覈。定議具奏。旋將呂留良嚴鴻逵及留良之子呂葆中皆剝尸梟示。子孫遣戍。婦女入官。沈在寬凌遲處死。而曾靜張熙二人則免罪釋放。

七月丙午。諭內閣。順承郡王錫保奏。在軍前效力之陸生柟通鑑論中。多抗憤不平之語。著於軍前正法。

閏七月。命立覺羅官學。

八月癸未。以曾靜等口供及歷次所降諭旨。刊刻大義覺迷錄。頒行天下。

十月甲寅。甯遠大將軍岳鍾琪奏。噶爾丹策零使臣特磊。於十月初五日前至陶賴大板斥堠。自稱原解送羅卜藏丹津前來。行至爾布和邵地方。遇逃回蒙古三人。知大兵已出。因將羅卜藏丹津送回。帝命劉廷琰伴送特磊赴京。

十一月。定滿漢科道品級。六科給事中俱爲正五品。各道御史。滿洲例由員外郎升授。漢軍例由郎中升授。俱爲正五品。漢御史由內閣侍讀翰林院編脩檢討各部郎中員外郎補授者。爲正五品。由主事中行評博行取知縣補授者。爲正六品。雍正八年庚戌。二月丁巳。晉封誠郡王允祉爲誠親王。貝勒允禩爲愉郡王。貝子允禕爲貝勒。封二十一阿哥允禧二十二阿哥允祐俱爲貝子。二十三阿哥允祜爲鎮國公。

四月。命改大學士尙書品級。大學士爲正一品。尙書爲從一品。賜周澍等三百九十九人進士及第出身有差。

五月辛未。怡親王允祥卒。

丁丑。帝以策妄喇布坦遣使特磊送出羅卜藏丹津。因聞進兵之信。暫行中止。因命寧遠大將軍岳鍾琪。靖邊大將軍傅爾丹來京。命侍郎杭奕祿衆佛保同特磊往諭準噶爾。

戶部議准江蘇巡撫尹繼善奏。蘇州府屬之常熟昭文二縣。舊有丐戶。不得列於四民。請除其籍。列為編氓。從之。

辛卯。宗人府等衙門議奏。誠親王允祉行事殘刻。罪惡日稔。應削去和碩親王。革退宗室。即行正法。得旨。允祉革去親王。其如何拘禁之處。候另降諭。

乙未。貝子允禧進封貝勒。公允禩仍封為郡王。弘哲晉封親王。公弘景晉封貝子。八月乙巳。戶部遵旨議奏。京畿各府有莊屯之地方。旗人事務繁多。應以二百里

內外為一路。分為八路。設官八員。分司辦理。得旨依議。

九月。雲貴總督鄂爾泰奏。建水州邊外猛弄塞長白氏內附。

河南道人賈士芳。舊居京師白雲觀。自言知醫。以薦入宮治病。口誦經咒。有天地聽我主持。鬼神歸我驅使之語。帝惡而殺之。

十月己亥。刑部等衙門議奏。曾任庶吉士徐駿。於詩文稿內。造爲譏訕背誕之言。應照大不敬律擬斬立決。從之。

雲貴廣西總督鄂爾泰奏。烏蒙蠻獠作亂。劫殺總兵官劉起元等。自請賜罷。速簡賢員料理總督事務。帝慰留之。爾泰旋奏官軍恢復烏蒙情形。

四川巡撫憲德奏。會鹽營所屬木里喇嘛六藏塗都內附。

辛亥。以兵部尚書查弼納爲將軍。往北路辦理軍務。

十一月。晉封喀爾喀扎薩克郡王丹津多爾濟爲扎薩克和碩親王。

庚寅。諭內閣。凡降旨特交事件。該衙門有卽行辦理者。亦有遲久尙未辦理者。總因無稽察督催之人。是以遲速不齊。間有耽延。嗣後著於滿漢文武大臣內派出數人。管理欽命上諭事件。專任稽查督催之責。

十二月。傅爾丹岳鍾琪。自京回北路西路軍營。

初。傅爾丹岳鍾琪。應召入京。詔以提督紀成斌。副將軍巴賽。護理印務。至是。紀成斌。奏。準噶爾。乘我不備。率衆二萬餘。來犯闕。舍圖卡倫。盜趕駝馬。總兵官樊廷。率副將冷大雄等。領兵二千。轉戰七晝夜。救出兩處卡倫官兵。會合總兵官張元佐等。擊殺敵兵。不計其數。將駝馬牲畜。悉行奪回。詔獎樊廷等。降紀成斌爲副將。設直隸河道水利總督一員。駐紮天津。

雍正九年辛亥。正月庚午。命工部左侍郎馬爾泰。協辦西安軍務。正紅旗滿洲都統德成。協辦青海噶斯軍務。

四月丙辰。廣東巡撫鄂彌達。奏。瓊山儋州歸化等州縣生黎內附。

六月。噶爾丹策零。遣大策零敦多策。零敦多卜。以兵三萬。犯北路。先遣諜伴爲我獲。詭言厄魯特大隊未至。其前隊千餘。駝馬二萬。在博克託嶺。距我軍三日程。傅爾丹信之。卽以兵萬餘往襲。副都統定壽。永圖。海壽等。交諫。不聽。敵以少兵誘我。

而伏兵二萬谷中。俄胡笳遠作。氈裘四合。乘高突衝。遂圍我前鋒四千於和通泊。萬矢雨集。衆寡不敵。傅爾丹以後軍往援。敵已潰。我參贊之師直犯大營。傅爾丹命索倫蒙古兵先禦之。科爾沁蒙古樹紅蠡先靡而遁。土默特蒙古樹白蠡奮摩敵壘。索倫兵但知蒙古兵敗。誤呼曰。白蠡兵陷敵隊矣。諸軍遂大潰。終夜甲仗聲不絕。惟流兵四千。衛輜重。且戰且退。渡哈爾納河。副將軍巴賽查納弼以下皆戰死。得還科布多二千人。敵獲我士卒。皆穿腫盛以皮囊。縛馬後。唱胡歌而返。蒙古科爾沁王匿萑苻中。免。傅爾丹反信其言。謂白蠡兵先敗。執土默特公沙津斬之。士卒憤怒。岳鍾琪聞北路被圍。乃使紀成斌進攻烏魯木齊。以分敵勢。敵已委城先徙。無所得。詔降傅爾丹爲振武將軍。以順承郡王錫保代之。斬先遁之參贊陳泰。移科布多營於察罕度爾。又以馬爾賽爲撫遠大將軍。屯歸化城。

初。傅爾丹至軍。卽進城。科布多至是。帝以從前令在科布多地方脩城。原欲駐兵進勦之意。今宜以保固疆域爲要務。敵退之後。將科布多兵丁。悉行撤回。令於察

罕度爾扎布幹等處駐紮。

八月命護軍統領馬蘭泰都統查克旦博爾屯巡撫武格爲撫遠大將軍馬爾賽參贊。

九月己丑。皇后那拉氏崩。

傅爾丹和通泊之敗。準夷大小策零乘勝謀東犯喀爾喀。以察罕度爾科布多皆有大軍。乃取道阿爾泰山迤南。小策零以精騎六千深入。而大策零擁大衆二萬於蘇克勒達。遙爲援應。我郡王額駙策凌與親王丹津多爾濟合兵迎擊於鄂登楚勒河。遣六百騎宵入敵營挑戰。誘其來追。而伏兵擊之。大破其衆。斬其驍將喀喇巴圖魯。詔晉封額駙和碩親王。時議以察罕度爾大營偏北。而敵每繞山南麓東犯。乃於推河、翁金河及拜達里克河三處各築城。與察罕度爾營犄角。命馬爾賽以綏遠將軍移守拜達里克城。

雍正十年壬子。正月壬午。命鄂爾泰爲保和殿大學士。兼兵部尙書。爾泰以雍正

四年春巡撫雲南兼總督事。奏言雲貴大患無如苗蠻。欲安民必先制夷。欲制夷必改土歸流。而苗疆多與鄰省犬牙相錯。又必歸併事權。始可一勞永逸。帝知爾泰才可辦事。因命以雲貴總督兼制廣西。畀以三省總督印。自四年至九年。蠻悉改流。苗亦歸化。帝嘉其功。錫封襄勤伯。召入爲大學士。以高其倬代之。

三月丁丑。大學士參奏寧遠大將軍岳鍾琪玩忽縱敵。有玷倚任。請敕部嚴加議處。得旨。該部嚴察議奏。初岳鍾琪之在西路也。先奏長驅擣襲之策。旋不敢自決。及八年牧場被劫。欲勉踐前言。復奏軍事十六條。帝謂一無可采。且敵屢擾土魯番。兵至卽遁。墮敵計。無成算。旋奏巴里坤西北四百餘里之木壘。形勢衝要。宜築城屯兵二萬。截敵來路。與巴里坤大營犄角。請以百口保其必效。帝從其議。會敵兵六千自烏魯木齊掠哈密。岳鍾琪遣總兵曹勳拒之於二堡。又檄將軍石雲倬等以萬人赴南山口。邀其歸路。遇敵相望二十里。遷延不擊。縱其飽颺。岳鍾琪劾奏治罪。大學士鄂爾奏等因並劾鍾琪。詔降三等侯。仍留軍營。戴罪立功。

五月辛酉。以京師旱。命清理刑獄。

閏五月己酉。予吏部尚書勵廷儀謚文恭。廷儀。勵杜訥子也。廷儀久官刑部。嘗疏陳考職積弊四條。又禁止私鹽四條。又清查入官家產弊端四條。俱下部議行。

六月。召岳鍾琪還京。其寧遠大將軍印務。著署陝西總督查郎阿署理。副將軍張廣泗暫行護理。命大學士鄂爾泰督巡陝甘。經略軍務。

七月。大學士蔣廷錫卒。予謚文肅。廷錫善畫花卉。多用逸筆寫生。點綴坡石。無不超絕。藝林寶之。

八月壬申。北路副將軍王丹津多爾濟額駙策凌奏。追擊準噶爾至厄爾得尼招地方。方七月間。噶爾丹策零親率其大衆。由北路傾國入寇。繞避科布多察罕度爾大營。取道山南。潛至杭愛山。掠哲卜尊丹巴胡土克圖之地。時哲卜尊丹巴已徙帳多倫泊。空無所得。探知額駙策凌軍赴本博圖山。遂突襲其帳於塔密爾河。盡掠子女牲畜。額駙中途聞之。卽反旆馳救。並急報順承親王。請師夾攻。策凌部

下有脫先渾者。能晝夜行千里。每登高峰嶺。輒以兩手張其衣。若阜雕鼓翼而立。故敵遠望不覺。盡得敵形勢。虛實歸報。遂嚮導蒙古兵三萬。繞間道出山背。黎明。自天而下。如風如雨。敵夢中起。人不及弓。馬不及甲。追擊於喀喇森齊泊。大戰二日。敵大敗。而西路援師不至。沿途轉戰十餘次。追至鄂爾昆河之杭愛山。卽古燕然山之南麓。其地右阻山。左迫水。道狹不容大衆。又橫亘以大刺麻寺。兵無走路。我兵乘暮薄險蹴之。呼聲震大漠。敵三萬。擊斬其半。擠墜溺死亦半。河水爲赤。我兵僅傷十餘。以無兵夾攻。故噶爾丹策零。乘夜突圍。繞山遁推河。盡棄輜重。牲畜塞滿山谷。以阻我師。策凌急檄馬爾賽。於拜達里克河邀其歸路。副將軍達爾濟整兵待發。馬爾賽不許。翌日。將士自開城追之。擊斬千計。而敵酋已從前隊過。詔斬馬爾賽及附和阻撓之都統李杓。以徇。旋黜順承郡王錫保爵。令軍前戴罪効力。

十月。奪岳鍾琪職。交兵部拘禁。

清史綱要 卷五
命振武將軍查克旦在靖邊大將軍參贊上行走。

十一月。以寧古塔將軍常德爲靖邊大將軍之副將軍。

甲辰。予故河東總督田文鏡諡端肅。

雍正十一年癸丑。正月。命各直省設立書院。

命鑄靖邊左右副將軍印二顆。交大將軍收貯。以備額駙策凌等調遣滿洲蒙古兵丁之用。

二月。封二十四阿哥允祕爲和碩誠親王。皇四子弘曆爲和碩寶親王。皇五子弘晝爲和碩和親王。

辛酉。晉封弘春爲多羅泰郡王。

壬戌。以戶部尙書彭維新協辦內閣事。

喇嘛扎卜與準噶爾戰於克蘭森齊老地方。棄軍奔往游牧處所。命革去扎薩克和碩親王。在京永遠監禁。以其弟德親扎布承襲。

原任副都統阿三。於大將軍調遣時。託故後期。遇敵奔北。命於軍前正法。

三月壬午。帝以準噶爾既敗。力蹙勢窮。不能遠涉藏地。且頗羅鼐輸誠效力。唐古特之兵。亦較前氣壯。見今藏地無事。命將從前防守之兵撤回。僅留數百名。

乙丑。理藩院參奏土默特輔國公沙津達賴。前於和通胡爾哈地方。臨陳遁歸。又於烏孫珠爾地方。對敵挫衄。請革去公爵。得旨。達賴著革去輔國公。在軍前效力贖罪。

四月癸丑。賜陳倓等三百二十八人進士及第出身有差。

乙卯。命嵇曾筠爲文華殿大學士。兼吏部尙書。仍管河道總督事。

詔在京三品以上及外省督撫。會同學政。薦舉博學鴻詞。一循康熙年間故事。

以方苞爲內閣學士。苞以戴名世南山集案。被逮入獄。聖祖赦而用之。命以白衣入直南書房。至是。以武英殿總裁擢居是職。

禁民間刊刻書籍。凡遇胡虜夷狄等字。每作空白。又或改易形聲。如以夷爲彝。以

虜爲鹵之類。

五月庚寅。諭州縣設立社倉。原以便民濟用。若遇應行借給之時。該州縣一面申詳上司。一面卽速舉行。方可以濟閭閻之緩急。聞直隸百姓。借領社穀。必待該督咨請部示。而後准行。往返動經數月。小民懸待孔殷。仍不免重利告貸之苦。嗣後著該督李衛。酌量定例。變通辦理。咨報存案。

乙未。辦理軍機大臣等奏。明歲進兵。請令副將軍額駙策凌塔爾岱。常德等。前往會同辦理。得旨。靖邊左副將軍印。著額駙策凌掌管。靖邊右副將軍印。著塔爾岱掌管。副將軍常德。著與額駙策凌同行。議政大臣永福。著授爲內大臣。與塔爾岱同行。

甲申。以編修張若靄。庶吉士鄂容安。鄂倫在軍機處行走。

六月丁巳。命武弁中熟習水師之人。毋得調補陸路。致用違其長。
七月。禁止直省將軍督撫提鎮。於經制外。濫給外委千把總牌札。

乙酉。大學士陳元龍以年老乞休。命以原官致仕。

戊子。以順承郡王錫保調度無方。坐失機宜。命平郡王福彭代爲定邊大將軍。乙未。大學士孫柱衰邁。命以原官致仕。

九月。刑部等衙門議准。署寧遠大將軍查郎阿。參奏總兵官曹勳。奉派領兵哈密。縱敵失機。飾詞捏報。請卽在軍前正法。得旨。曹勳著在軍前正法示衆。

十一月甲辰。命果毅公訥親在軍機處行走。

十二月壬子。命順承郡王錫保子熙良襲封多羅順承郡王。代其父效力贖罪。

雍正十二年甲寅。二月乙丑。遣翰林院侍讀春山兵科給事中李學裕。致祭故安南國王黎維禔。並敕封嗣王黎維祐爲安南國王。

三月。河南學政俞鴻圖受賄營私。伏誅。

五月丁酉。命北路副將軍額駙策凌。西路署大將軍查郎阿。俱馳驛來京。命大將軍平郡王福彭。帶領傅爾丹。暫駐科布多。平郡王未到之先。著塔爾岱常德等暫

行辦理。

六月。降旨罷兵。遣侍郎傅鼐額外內閣學士阿克敦。往諭準噶爾台吉噶爾丹策零。

九月。帝以各省生童。往往因與地方有司爭競齟齬。相率罷考。此風最爲惡劣。諭嗣後如果地方官有不公不法陵辱士子等情。許生童等赴該上司衙門控告。儻不行控告。而邀約罷考者。卽停其考試。

十月。命尙書三泰徐本俱協辦內閣大學士事。

裁浙江總督。仍設浙江巡撫。及浙閩總督。又以苗疆事竣。雲貴總督不必兼管廣西。仍歸兩廣總督統轄。

四川夔州稅務。向從京師派員監督。命嗣後改爲由地方大吏。委人管理。

雍正十三年乙卯。二月。禁文武生員入伍食糧。

甲子。命工部尙書巴泰協辦內閣大學士事。

三月丙子。前遣往準噶爾使臣傅鼐等奏稱。噶爾丹策零請內哲爾格西拉胡魯蘇地方。爲我喀爾喀遊牧地界。帝命將傅鼐等奏摺並地圖。密寄額駙策凌。令其細閱。策凌旋奏請。以阿爾泰山爲界。山東令我處巡邏。山西令彼處巡邏。所有遊牧。斷勿令過阿爾泰山嶺。方爲善策。報聞。

四月。停旌表烈婦之例。

五月。貴州苗疆復亂。命果親王允禮。寶親王弘曆。和親王弘晝。及大學士鄂爾泰。張廷玉。尙書慶復。魏廷珍。憲德。張照。徐本。都統李禧。甘國璧。侍郎呂耀曾。俱辦理苗疆事務。

以湖廣提督董芳。熟悉苗地情形。授爲副將軍。一切勦撫機宜。與揚威將軍哈元生。和衷協力。公同辦理。

七月。解大學士鄂爾泰任。削去伯爵。初。苗疆關地二三千里。幾當貴州全省之半。增設營汛。凡腹內郡縣防兵。大半移戍新疆。又鄂爾泰用兵招撫。止及古州清江。

未及台拱之九股苗。有司輒稱台拱願內屬。巡撫元展成易視苗疆。遽於十年設營駐兵。時秋稼未獲。苗佯聽版築。而日夜刈穫。甫畢。即專集上下九股數百寨苗。叛圍大營。并扼排略大關之險。以阻餉道。營中樵汲皆斷。掘草根死守彌月。援至始解。提督哈元生入覲回黔。十一年春。進軍台拱。攻苗於番招之蓮花壘。壘窟萬山巔。四面削箐。糗支二載。官兵六路破之。設戍其上。十三年春。苗疆吏以徵糧不善。遠近各寨蜂起。徧傳木刻妖言四煽。省城大吏尙不之信也。總兵韓勳破苗古州之王家嶺。苗復聚集清江台拱間。號召日衆。番招屯復圍於苗。元展成與哈元生不合。倉卒調兵五千。盡付副將宋朝相領之赴援。半途困於苗。苗探知內地防兵。半戍苗疆各城。守備空虛。於是乘間大入。陷凱里。陷重安江驛。陷黃平州。陷岩門司。陷清平縣餘慶縣。焚掠及鎮遠思州。而鎮遠府治無城。人心洶懼。台拱清江各營汛。亦多爲苗誘陷。亂氛四起。本省兵徵調殆盡。奔救不遑。驛路四隔。省城戒嚴。鄂爾泰以前功不成。自請罷斥。帝令給假養病。仍食大學士俸。

辛酉。以邁柱爲武英殿大學士。兼吏部尙書。查郎阿爲文華殿大學士。兼兵部尙書。

八月丁亥。帝不豫。戊子。大漸。召莊親王允祿、果親王允禮、大學士鄂爾泰、張廷玉、領侍衛內大臣豐盛、額訥親、內大臣戶部侍郎海望。至寢室前。大學士鄂爾泰、張廷玉、恭捧御筆。親書密旨。命皇四子寶親王弘曆爲皇太子。卽皇帝位。少頃。皇太子傳旨。著莊親王允祿、果親王允禮、大學士鄂爾泰、張廷玉、輔政。

己丑。子刻。帝崩。壽五十有八。是歲十一月。上尊諡曰敬天昌運建中表正文武英明寬仁信毅大孝至誠憲皇帝。廟號世祖。

諭鄂爾泰前因患病解任調理。今旣輔政。著復任。

以遺命奉妃母爲皇太后。復奉皇太后懿旨。以元妃爲皇后。

召朱軾回京。以嵇曾筠總理浙江海塘工程。

諭以皇考諭旨。張廷玉、鄂爾泰俱配享太廟。卽將此旨繕入遺詔。

召張照回京。以張廣泗總理苗疆事務。初。張照奉命赴苗疆。且令察其利害。照至沅州鎮遠。卽密奏改流非策。致書諸將。首倡棄地之議。且袒董芳。專主招撫。與哈元生齟齬。楚粵官兵。皆隸芳麾下。旋議分地分兵。施秉以上。用滇黔兵隸元生。施秉以下。用楚粵兵。隸董芳。於是已進之兵。紛紛改調互換。而哈元生董芳。遂欲將村寨道縣。盡畫上下界。文移辨論。致大兵雲集數月。曠久無功。苗乘間復出焚掠。清平黃平施秉間。紛紛告警。官軍顧此失彼。疲于奔命。當是時。中外畏事者。爭咎前此之不當關。目前苗疆之不可守。前功幾盡失。全局幾大變。至是。召張照還。授張廣泗七省經畧。哈元生以下。咸受節制。旋逮張照董芳哈元生。元展成治罪。辛卯。諭內監等。國家政事。毋許妄行傳說。外言亦無得傳入內廷。違者正法。道士張太虛王定乾等。以鑪火修鍊之說。供奉西苑。帝命驅逐回籍。

壬辰。諭大將軍查郎阿駐肅州。與劉於義同掌軍務。北路大將軍平郡王福彭。堅固防守。

己亥。皇太子卽皇帝位於太和殿。以明年爲乾隆元年。

命朱軾協同王大臣總理事務。

己酉。賜莊親王允祿果親王允禮。永遠食雙俸。鄂爾泰張廷玉世襲一等輕車都尉。朱軾世襲騎都尉。

命廷臣輪班奏事。

詔大學士以下三品京堂以上。平日深知灼見之人。不拘品級資格。據實密封以聞。

命文武官員見在議革者。俱准寬免。

大學士馬齊以年老乞休。允之。

十月。命副將軍常德赴北路軍營。

授大學士張廷玉三等子。以長子張若靄襲。

丁丑。釋圈禁宗室。

清史綱要 卷五
命尙書徐本軍機處行走。

命設張家口至鄂爾坤臺站。接運軍米。

授鄂爾泰一等子。世襲罔替。

壬辰。停舉人充鄰省鄉試同考官。

吏部議刑部尙書徐本奏。請復知縣行取舊例。應行知各省督撫。遇行取之年。於正途出身知縣內。揀選賢能出衆之員。不拘資格。大省保舉五六員。小省保舉三四員。送部引見。以主事用。至所奏行取知縣揀補御史之處。查御史見改爲正五品。於翰林編檢各部郎中員外郎內保舉簡用。若知縣卽行升補。未免過優。應無庸議。從之。

革弘春貝子爵。不許出門。

十一月。升各省教職品級。教授係從九品。加爲正七品。學正教諭訓導係未入流。學正教諭加爲正八品。訓導加爲從八品。

乙巳諭皇考樂育人材。特降諭旨。令直省督撫及在朝大臣。各保舉博學鴻詞之士。以備制作之選。乃直省奉詔已及二年。而所舉人數寥寥。朕今再爲申諭。凡在內大臣及各直省督撫。務宜悉心延訪。速行保薦。定一年內齊集京師。候朕廷試。倘直省中實無可舉。亦卽具本題覆。

追封皇一兄弘暉。皇八弟福慧爲親王。

命慶復爲定邊大將軍。

癸丑嚴禁銷燬制錢。

諭河南地方。自田文鏡爲巡撫總督以來。苛刻搜求。以嚴厲相尙。而屬員又復承其意旨。剝削成風。豫民重受其困。卽如前年匿災不報。至於流離。蒙皇考降旨嚴飭。遣官賑卹。始得安全。此中外所共知者。乃王士俊接任河東。不能加意惠養。且擾亂紛更。以爲幹濟。借墾地之虛名。而成累民之實害。彼地民風淳樸。竭蹶以從。罔敢或後。誠屬可嘉。然先後遭督臣苛政。其情亦可憫矣。王士俊著解任。來京候

清史綱要 卷五
旨。河南仍照舊例。止設巡撫。卽著工部侍郎富德補授。

復阿其那塞思黑紅帶。收入玉牒。

十二月丙寅朔。命纂八旗氏族通譜。

丁卯。諭王大臣等。前令文武大臣官員科道等輪班條奏。自後不必拘定班次。隨時陳奏。

戊寅。恭上皇太后徽號曰崇慶皇太后。

甲申。諭審案不許株連婦女。

殺曾靜張熙。

壬辰。纂修明史成。

清史綱要卷之五終

清史綱要卷之六

乾隆元年丙辰。正月。準噶爾噶爾丹策零遣使吹納木喀入覲。並貢方物。

癸丑。撤西北兩路大兵。酌留鄂爾坤及烏里雅蘇臺駐防兵丁。召大將軍慶復回京。派參贊二員。協同策凌辦事。

丙辰。命將京師及各省見開捐納事例。一概停止。祇留捐監一條。

二月。命喀爾喀每歲選兵三千。屯駐鄂爾坤防秋。

戊子。尊世宗憲皇帝陵曰泰陵。

三月庚子。赦汪景祺查嗣庭兄弟族屬回籍。

頒十三經二十一史於各省會及府州縣學。

設盛京宗學覺羅學。

壬戌。吏部議覆御史鍾衡奏。請加國子監從八品助教爲從七品。正九品學正從九品學錄爲正八品。正八品監丞加爲正七品。從八品博士加爲從七品。滿州蒙

古助教等缺品級。均歸畫一。從之。

甲子。張廣泗奏報。合攻牛皮箐苗寨。首逆就獲。搜剿餘黨無算。廣泗既調全黔兵。集鎮遠。以通雲貴往來大路。簡選將士。面授方略。以精兵四千餘。攻上九股。四千餘。攻下九股。而自統五千餘。攻清江下流各寨。刻期並舉。號令嚴明。所向克捷。苗衆盡竄入牛皮大箐。箐圍苗巢之牛盤。亘數百里。北丹江。南古州。西都勻。八寨。東清江台拱。危巖切雲。老樾蔽天。霧雨冥冥。泥濘蛇虺所國。苗恃官兵所不能到。廣泗檄諸軍分扼箐口。以坐困之。許其黨自相斬捕除罪。由是黨魁罔漏。俘馘萬計。其飢餓顛隕死厓谷者。不可勝計。

四月。令各處尼僧不能還俗者。暫給度牒。不許招受年少生徒。嗣後婦女。必年踰四十。方准出家。年少者嚴行禁止。

乙亥。命保舉賢良方正。

裁直隸副總河。以總督兼管河務。

戊子。賜金德瑛等三百四十四人進士及第出身有差。

五月。停止山西巡察。

吏部奏。各省督撫幕賓。雍正元年奉旨。令分別保題議敘。布按二司。爲通省錢穀刑名之總匯。應准照督撫之例。分別保薦。從之。

免曾靜張熙戚屬緣坐。

六月甲戌。頒工部見用營造官尺式於直省。凡工程俱用部頒。

七月甲午。諭。朕思宗社大計。莫如建儲一事。朕今卽位已逾半載。未經降旨。良以人心不古。往往有因建儲太早。以致別生事端。皇考當日。於建儲一事。親書密旨收藏。朕今惟有循用皇考成式。親書密旨。著總理事務王大臣。親看宮中總管太監。謹收藏於乾清宮正大光明殿匾額之後。

停稽查歸化城御史。

戊申。定五等世職漢文。以精奇尼哈番爲子。阿思哈尼哈番爲男。阿達哈哈番爲

輕車都尉。仍各分等。拜他喇布勒哈番爲騎都尉。拖沙喇哈番爲雲騎尉。

辛亥。追諡明建文皇帝爲恭閔惠皇帝。

戊午。給佐雜離任身故回籍路費。

署四川巡撫王士俊密摺陳奏四條。忤旨。拿解來京。交法司嚴審。嗣定爲斬監候。秋後處決。旋命寬免。

八月丙寅。禮部右侍郎徐元夢。以年老乞解任。允之。命加尙書銜。食俸。在史館內。廷等處行走。

九月丙申。總理事務王大臣刑部議奏古州苗疆一案。張照哈元生均擬斬。董芳元展成發邊遠充軍。德希壽枷號鞭責。奉旨俱着從寬免死。旋賞哈元生副將銜。發往西路軍營効力。董芳發往雲南。以副將用。張照在武英殿行走。

丁酉。禮部尙書楊名時卒。予諡文定。

致仕大學士朱軾卒。予諡文端。軾與方苞交最善。嘗同直內閣。衆旣退。坐必下之。

行必後之。苞固辭。軾曰。衆爭爲市道交。卽此可示之以禮矣。

致仕大學士陳元龍卒。予諡文簡。

十月。引見考取博學鴻詞劉綸等十五員。劉綸潘安禮諸錦于振杭世駿俱授翰林院編修。陳兆崙陳玉麟夏之蓉周長發程恂俱授翰林院檢討。楊度汪沈廷芳汪士鋯陳士璠齊召南俱授翰林院庶吉士。

是月。經略張廣泗奏報軍務全竣。

十一月。命徐本爲東閣大學士。兼禮部尙書。

十二月庚申。命常安管理北路糧餉。

戊寅。命科道官不兼部務。

乾隆二年丁巳。二月丙寅。安南國王黎維祜卒。嗣子黎維禕遣使告哀。附貢方物。

戊寅。遣翰林院侍讀嵩壽修撰陳倌。冊封黎維禕爲安南國王。

三月壬子。御史謝濟世言事忤旨。嚴行申飭。

四月。以旱。命刑部清理庶獄。

准包衣佐領管領與八旗聯姻。

釋傅爾丹、陳泰、岳鍾琪於獄。

賜允祿、允禔、公爵、空銜。不必食俸。

五月辛卯。賜于敏中等三百二十四人進士及第出身有差。

戊戌。御試翰林詹事等官。擢陳大受等三員爲一等。餘升黜留館有差。

准本年新進士條奏地方利弊。

丁巳。命在京旗員有親喪者。二十七個月之內。凡遇朝會祭祀之禮。免其行走。

七月乙未。以永定河隄工衝決。命協辦吏部尚書事顧琮前往。會同李衛、劉勤籌畫辦理。

壬寅。御試續到博學鴻詞於體仁閣。授萬松齡、張漢爲翰林院檢討。朱銓、洪世澤爲翰林院庶吉士。

八月壬戌。命巡漕御史四員。分駐淮安濟寧天津通州。

閏九月戊午。濬直隸涑水縣拒馬河。

十月庚戌。命清理馬政。

十一月。命額駙策凌護送準噶爾使來京。以海蘭署理副將軍。

辛巳。命大學士鄂爾泰張廷玉尙書訥親海望侍郎納延泰班第爲軍機大臣。

壬午。詔翰林坊缺仍帶俸深編修檢討二十員引見。

劉元燮奏辭廣西蒼梧道。請仍留御史之任。帝以有意規避。著革職。發往廣西。以佐貳等官。令其效力。

十二月丁亥。冊立嫡妃富察氏爲皇后。

命官員准丁本生父母憂一年。

大學士邁柱以病免。

癸卯。封大學士張廷玉爲三等伯。

清史綱要 卷六
乾隆三年戊午。正月。命福敏爲武英殿大學士。兼工部尙書。

遣散秩大臣祥泰。內閣學士岱奇。冊封朝鮮國王李昉子暄爲世子。

準噶爾使臣達什等奉表至京師。帝以其表辭恭順。遣侍郎阿克敦御前三等侍衛旺扎爾。乾清門頭等台吉額默根充副使。將應議之事。明悉曉諭。卽與來使一同起程。

三月壬申。以旱。命刑部清理庶獄。

四月。以旱求言。

五月辛酉。貴州定番州苗滋事。總督張廣泗討平之。

甲子。予故大學士邁柱諡文恭。

丙寅。定各省水旱災五分卽准蠲免例。

七月甲子。復設稽查內務府御史。

丁丑。大學士尹泰乞休。允之。

八月癸巳。設各部院督催所。

九月。裁浙江總督。復設巡撫。仍歸閩浙總督管轄。

予告大學士尹泰卒。予諡文恪。

十月。直隸總督李衛卒。予諡敏達。

十一月己未。鑲黃旗漢軍都統納穆圖等奏請年羹堯之子年秀等。可否准其考試當差。不允。

大學士嵇曾筠以病乞回籍。允之。

十二月辛巳。定雲南煙瘴官三年俸滿例。

乙酉。命尙書鄂善議政處行走。

戊戌。發帑銀一百萬兩。修濬江南水利。命大理卿汪澐前往督辦。

乾隆四年己未。正月癸丑。命通政使德爾敏往江南。同大理寺卿汪澐督辦水利。大學士嵇曾筠卒。予諡文敏。曾筠父永仁。以生員爲范承謨書記。與之俱殉耿精

忠之難。

三月。吏部奏請行取直隸等省知縣二十一員。得旨依議。

命吏部尙書公訥親協辦大學士。

四月辛巳。賜莊有恭等三百二十八人進士及第出身有差。

丙戌。以旱。申命求言。

戊子。命刑部清理庶獄。減徒以下罪。

丁酉。禁江西龍虎山正一真人傳度。

己亥。以畿輔缺雨。仍弛奉天米船海禁。

癸卯。飭直隸江南捕蝗。

五月。予告大學士馬齊卒。予諡文穆。詔以馬齊歷任三朝。年踰大耋。特命和親王大阿哥永璜公訥親等往奠茶酒。

六月壬午。增派查旗御史。

八月。命仿朱子通鑑義例。編纂明紀綱目。

壬午。敕張廣泗經理苗疆功。加授三等輕車都尉世職。

十月乙亥。準噶爾台吉孟克率屬內附。授爲三等侍衛。

己丑。宗人府議奏。莊親王允祿與弘皙弘昇弘昌弘皎等。結黨營私。往來詭祕。請將莊親王允祿等革去封爵。帝命莊親王從寬免革親王。仍管內務府事。其親王雙俸及議政大臣理藩院尙書。俱著革退。弘皙革去親王。不必在高牆圈禁。仍在鄭家莊居位。不許出城。弘昇照宗人府議。永遠圈禁。弘昌革去貝勒。弘普革去貝子。弘皎從寬仍留王號。永遠住俸。

命盛京工部侍郎法敏赴北路軍營。管理糧餉。

十二月戊寅。命弘皙及其子孫。拿交內務府總管。在景山東菓園永遠圈禁。因福寧首告弘皙。聽信安泰邪術。大逆不道。審訊得實也。安泰亦坐絞。

乙酉。晉封西藏貝勒頗羅鼐爲郡王。

乾隆五年庚申正月。湖南綏寧等處苗匪滋事。敕巡撫馮光裕調兵剿撫。

二月丁丑。命直隸山東山西湖南廣東等省招商採煤。

四月壬申。命各直省封印後。用豫印空白。

五月壬寅。額駙策凌等奏。喀爾喀準噶爾。以鄂爾海分界。從之。

丙辰。因旱。命刑部清理庶獄。

六月。命張廣泗來京陛見。以張允隨署貴州總督。慶復兼理雲南巡撫。

戊子。禁革職人員濫用章服。

閏六月乙卯。命貴州總督張廣泗至湖南。與巡撫馮光裕會商苗疆軍務。馮光裕尋卒。命張廣泗留辦湖南軍務。

飭湖廣提督杜愷廣西提督譚行義。會剿苗獠。

七月甲戌。禁私售旗地。

丙子。命喀爾喀王等。與兩路軍營會議撤兵。

乙酉。申嚴武職官員乘轎之禁。

八月戊辰。廣西提督譚行義奏官兵擒獲首逆。苗境悉平。遵旨前往楚省辦理軍務。

九月。諭楚粵自提督總兵以下。俱受張廣泗節制。並鑄欵差大臣關防一顆。遣官馳驛送往。

十月。永禁胥役更名充牙。

十一月癸未。重輯大清律例成。

甲午。纂修大清一統志書成。

十二月庚子。禁京官濫交富戶。

壬寅。張廣泗奏楚粵苗疆悉平。

乾隆六年辛酉正月。命各直省督撫學政採訪元明以及國朝名人著作。無論刻本鈔本。隨時進呈。

甲申。命鄂爾泰。訥親。會同孫嘉淦。顧琮。查勘永定河工。

甲午。命原任湖廣總督班第。仍在軍機處行走。

三月。御史仲永檀。奏參提督鄂善受賄。帝親訊得實。鄂善賜自盡。超擢仲永檀爲
僉都御史。

六月甲午。飭官員防閑幕友。

丙辰。大學士趙國麟。因事降調。

七月甲子。命北省勸民私開溝洫。

山西學政喀爾欽。以賄賣生童。縱僕營私。違禁漁色。伏法。

禁各省見任官員。建立生祠。

命陳世倌。爲文淵閣大學士。兼工部尙書。

戊子。帝初舉秋獮。奉皇太后幸熱河。避暑山莊。

貴州永從縣苗匪滋事。總督張廣泗討平之。

九月壬午。帝奉皇太后還京師。

十一月。尙書徐元夢卒。予諡文定。徐元夢初以不附明珠。爲珠黨所陷。得罪幾死。聖祖旋知其枉。命入南書房。浸至大用。

十二月乙未。左都御史劉統勳奏。大學士張廷玉。歷事三朝。小心敬慎。然大名之下。責備恆多。勳業之成。晚節當慎。外間輿論。動云桐城張姚兩姓。占却半部揔紳。此盈滿之候。而傾覆之機。所易伏也。請敕下大學士張廷玉。會同吏部衙門。將張姚二姓。果係親房近支。累世密戚。見任之員。三年之內。停其升轉。又奏尙書公訥。親未及強仕之年。總理吏戶兩部。入典宿衛。參贊中樞。兼以出納王言。趨承禁闈。此外特交事件。尙有多端。即使精力有餘。亦苦分身乏術。宜量行減省等語。帝以其疏宣示羣臣。其後二臣不能全其晚節。一如統勳所言。

大學士張廷玉請解部務。不許。

增殺虎口至綏遠城兵額。

清史綱要 卷六
禁武職干預民事。

乾隆七年壬戌。二月。諭從前選拔。或十數年一舉。今則六年一舉。爲期太近。嗣後定爲十二年一次。永著爲例。

三月。命大學士九卿。擇素所深知之人。有骨鯁之風。而復明通內外政治者。不拘資格。列名封奏。以備臺諫之選。

四月。噶爾丹策零遣使臣吹納木喀等請赴藏熬茶。勿限年分。帝以策零意甚狡詐。飭兩路軍營加意防範。

停文武鄉會互試之例。

賜金姓等三百二十九人進士及第出身有差。

命八旗漢軍有願改歸原籍者。聽從其便。

五月乙丑。命發滿洲單戶一千名。移駐拉林阿勒楚喀屯田。

六月壬辰。命莊親王允祿尙書三泰張照管理樂部。

十一月乙亥。命陳世倌會同高斌查勘江南水利。

十二月戊子。仍准準噶爾由多倫鄂羅木入藏熬茶。

丙申。諭我朝文臣無封公侯伯之例。大學士張廷玉伯爵。係格外加恩。其奏請與其子張若靄承襲之處。不合。今著帶於本身伊子張若靄不必承襲。

大學士鄂爾泰以其子鄂容安曾向仲永檀私探留中密奏爲御史所劾。爾泰曾奏保仲永檀端正。帝命將鄂爾泰交部議處。

乾隆八年癸亥。正月己未。命安插準噶爾降人於寧古塔。

二月癸巳。考選御史試以時務策。杭世駿有滿洲賢才雖多。較之漢人。僅十之三四。天下巡撫當滿漢參半。總督則漢人無一焉。何內滿而外漢也等語。帝大怒。降旨詰問。世駿尋革職。

己亥。命九卿保舉堪任河工人員。

命青海馬貢寬免五年。

庚戌。停江南牛稅一年。

三月。命沿海駐防大員。兩年出巡一次。

四月。丙申。纂修醫宗金鑑成。

閏四月。丁巳。御試翰林詹事等官。擢王會汾等三員爲一等。餘升黜留館有差。

辛酉。補試由部院改入翰詹人員。學士孔泰等升黜有差。

六月。癸丑。定藩臬任滿三年入覲例。

大學士等奏請禁止種煙。詔城堡間閒隙之地。聽其種植。城外及近城畸零菜圃。亦不必禁。其野外土田阡陌相連之處。概不許種。

丙辰。以旱。申命求言。

七月。戊子。帝奉皇太后詣盛京。謁祖陵。乙未。駐熱河。己亥。自熱河啟鑾。詣盛京。

十月。辛亥。帝奉皇太后自盛京回鑾。

令大臣自陳乞賜罷斥者。各舉德行材能堪自代之人。隨疏奏聞。但不得舉同列。

及位在己上者。著爲令。

甲戌。帝奉皇太后還京師。

十一月。令新選州縣官。於九卿驗看時。摘問律例數條。令其條對。與履歷並呈。著爲例。

己亥。彗星見。特詔修省。

十二月。飭直省各令挖除蝻孽。

辛亥。大學士陳世倌告假回籍。命吏部尙書史貽直協辦大學士。

準噶爾遣使進表貢方物。

乾隆九年甲子。正月庚子。命尙書公訥親查閱河南山東江南營伍。並勘驗河工海塘。

命史貽直爲文淵閣大學士。兼吏部尙書。

三月丙戌。帝以西藏郡王頗羅鼐之子公珠爾默特策布登等。經理準噶爾進藏。

防範合宜。優賚之。

戊子。禁臺灣武職任所置產。

四月己巳。以旱。命刑部清理庶獄。

五月壬寅。以興修直隸水利。命協辦大學士劉於義往保定。會同高斌籌畫。

六月己酉。大學士徐本以病乞休。允之。

十月己酉。陳世倌假滿回京。命入閣辦事。

庚午。帝幸翰林院。

十一月癸巳。準噶爾部人察罕庫克新率屬內附。授爲七品官。

十二月甲辰。命各省錢穀刑名年終彙冊報部。

乾隆十年乙丑。正月。命會試改期三月。嗣後卽以爲例。

去從前鄉會試士子皮衣去面氈衣去裏之例。

刑部尙書張照卒。予諡文敏。

二月乙巳。添設廣東駐防水師營。

三月己丑。協辦大學士禮部尙書三泰乞休。允之。

庚寅。命吏部尙書訥親協辦大學士。

四月丙午。申諭各省學臣釐正文體。

乙卯。大學士鄂爾泰卒。命遵皇考遺諭。配享太廟。予諡文端。

貴州總督張廣泗請開貴州大定府。畢節縣屬赤水河。由遵義府直達四川重慶府。以便往來。從之。

癸亥。以旱。命刑部清理庶獄。

五月壬申。賜錢維城等三百十三人進士及第出身有差。

戊子。命訥親爲保和殿大學士。兼吏部尙書。

停江南河工捐例。

六月癸卯。命撥黑龍江等處閒丁。移屯佛忒喜蘇蘇墾地。

命江南釐剔收漕積弊。

命戶部侍郎傅恆軍機處行走。

七月丁丑。諭會典開載。康熙年間。選拔庶常後。有選派講讀。修撰編檢數員。爲小教習之例。教習漢庶吉士。詩文四六。今科庶吉士。著掌院張廷玉。阿克敦。教習庶吉士德沛。汪由敦。於見任講讀編檢內。選派數員。爲小教習。

壬辰。帝奉皇太后巡幸多倫諾爾。戊戌。駐避暑山莊。

九月癸未。駐宣化府。

禁用非法刑具。

乙酉。命山西丁銀攤入地糧。

癸巳。帝還京師。

十月。命四川嚴查國匪。

十一月己卯。定駐藏官兵三年換班例。

壬午。帝以準噶爾噶爾丹策零死。命西北兩路邊卡慎固防守。

十二月。雲南總督張允隨請開金沙江上游之蜈蚣嶺等十五灘。可免盤剝之煩。從之。

辛亥。大學士福敏以老病乞休。優詔允之。

命慶復爲文華殿大學士。仍留川陝總督任。以高斌協辦大學士。

乙卯。諭高斌蔣溥俱著在軍機處行走。海望精力漸不如前。且所辦事務繁多。不必兼軍機處。

乾隆十一年丙寅。先是。詔普免各省錢糧一次。經大臣等酌議以耗羨乃有司養廉及辦理公務之所必需。應令照舊輸納。帝以正賦旣蠲。而耗羨又令完納。仍不免追呼之苦。命緩至開徵之年。一併完納。其公用不敷之處。令督撫酌量辦理。

三月乙卯。命大學士尙書等。將可以勝尙書侍郎督撫之任者。秉公舉出。各自密奏。

乙亥。準噶爾台吉策妄多爾濟那木扎勒遣使哈柳進表請安。並貢黃貂皮四十張。

四川瞻對土酋班滾作亂。大學士川陝總督慶復帥師討之。日久無功。遣內大臣班第努三等前赴軍營。

閏三月。律呂正義後編書成。

丁巳。重修明通鑑綱目書成。

五月丙午。以攻克如耶功。加慶復太子太保。

六月丙寅。慶復奏會同班第努三李質粹進攻了魯泥日寨。施放地雷。班滾並泥日寨頭目姜錯太等燒斃礮內。報聞。然二人實未死。逃入金川。經張廣泗訪查得實以聞。

十月。諭大學士張廷玉。年逾古稀。每日晨興赴闕。未免過勞。此後不必向早入朝。或遇炎蒸風雪。亦不必勉強進內。其有應辦事務。可以在家辦理。

十二月己巳。命十年一修玉牒。

癸未。準噶爾台吉策妄多爾濟那木扎勒。遣使臣瑪木特等至京進表請安。貢方物。

乾隆十二年丁卯。正月癸卯。准福建商民赴臺灣販運米穀。

甲寅。命大學士慶復查閱甘肅營伍。

二月。申禁喪葬演戲。

三月。召大學士慶復回京。以貴州總督張廣泗調補四川總督。時大金川安撫司莎羅奔不奉法。奪伊姪小金川土司澤旺印。劫以歸。四川總督檄諭之。始還澤旺故地。未幾。又攻革布什札及明正兩土司。巡撫紀山遣副將率兵彈治。不奉約。反傷我官兵。紀山奏請進剿。帝以廣泗征苗有功。故任之。

壬寅。大學士查郎阿以老病乞休。允之。

西藏郡王頗羅鼐卒。派大臣索拜前往祭奠。

丙午。命高斌爲文淵閣大學士。兼吏部尙書。以來保爲吏部尙書。協辦大學士。

乙卯。命保選堪勝道府人員。

四月。孫嘉淦以老病乞休。允之。

乙亥。諭差遣巡察官員。原令其稽查地方事務之廢弛。近因按年輪流。遂視爲泛常。毫無裨益。反於地方滋擾。俱卽撤回。

五月己亥。命軍機大臣等定各省督撫養廉銀兩。

六月癸亥。封十四皇叔允禩爲貝勒。

戊寅。移甘肅肅州回民分駐哈密。

七月戊申。帝奉皇太后秋獮木蘭。乙卯。駐避暑山莊。

八月甲子。飭禁紳士專利把持鄉曲。

九月丙午。帝奉皇太后還京師。

十一月戊戌。命暫開奉天海運。

十二月。致仕大學士徐本卒。予諡文穆。本徐潮子。嘗同浙江總督程含章鞠治江山奸民。王益善等謀不軌事。置爲首十餘人於法。所全活甚衆。

大學士慶復以謊報班滾焚斃。革職家居待罪。

禁年少宗室公等及滿洲大臣乘輜。

命來保爲武英殿大學士。

乾隆十三年戊辰。正月。封十四叔允禩爲郡王。

以進剿大金川。命兵部尙書班第馳驛前往。將一切驛站挽運沿途查辦。至軍後。調度糧運事務。給予欽差大臣關防。

乙巳。命阿克敦協辦大學士。

二月戊午。帝奉皇太后率皇后東巡。癸亥。駐趙北口。戊寅。駐曲阜縣。己卯。釋奠孔廟。壬午。駐泰安府。癸未。詣岱嶽廟。登岱。

三月戊子。駐濟南府。壬辰。自濟南回鑾。乙未。至德州登舟。亥刻。皇后崩。命莊親王

允祿和親王弘晝奉皇太后緩程回京。帝駐德州水次。

協辦大學士吏部尙書劉於義卒。予諡文恪。

辛丑。帝還京師。

四月己未。準噶爾遣使臣唵集等表貢方物。

以大學士訥親爲經略大臣。馳驛前往四川。經略軍務。張廣泗師久無功。副將張興游擊孟臣皆戰死。故有是命。又起故將軍岳鍾琪於廢籍。以提督銜赴軍自効。命吏部尙書陳大受在軍機處行走。

己巳。命陳大受協辦大學士。

起原任領侍衛內大臣傅爾丹爲內大臣。兼統領。馳驛前往大金川軍營。

庚辰。裁都察院僉都御史。通政司右通政。大理寺少卿。詹事府少詹事。漢缺各一。太僕寺少卿。國子監司業。滿缺各一。改通政司滿參議一缺爲右參議。改滿漢左

通政二缺俱爲通政副使。

五月辛丑。禁福建商民從天主教。

賜梁國治等二百六十四人進士及第出身有差。

六月庚申。試翰林詹事等官。擢齊召南等三員爲一等。餘升黜留館有差。

大學士阿克敦。以辦理大行皇后冊文錯誤。照大不敬律。斬監候。秋後處決。旋加恩在內閣學士上效力行走。令署理工部侍郎事務。

七月初。浙江總督喀爾吉善。奏參浙江巡撫常安貪婪。命大學士高斌會同巡撫顧琮往審。初以失察覆奏。命再行嚴審。始審出婪贓屬實。又命大學士訥親往審。高斌顧琮均革職留任。至是。常安論絞。

刑部尙書盛安。因議知府金文醇在皇后喪中剃頭一案。有意從輕。議斬監候。旋赦免。

閏七月。江南總河周學健。因於皇后喪二十七日後卽剃頭。革職發往直隸修理城工贖罪。湖廣總督塞楞額。巡撫彭樹葵楊錫絨。俱以居皇后喪剃頭。塞楞額賜

自盡。彭樹葵楊錫紱革職承修城工贖罪。

八月。四川巡撫紀山革職。發往軍營。聽經略大學士訥親委用。

九月甲子。命尙書班第赴軍營。同傅爾丹岳鍾琪辦理軍務。

命侍郎舒赫德軍機處行走。

諭國朝寶璽。朕依次排定。其數二十有五。印文向兼清漢。內青玉寶係清字篆文。乃太宗時所貽。自是以上四寶。均世代相承。傳爲世寶。不宜輕易。其檀香寶以下二十一寶。從新定清字篆體改鑄。

命大學士傅恆暫管川陝總督印務。旋代訥親爲經略大臣。訥親之初至軍。銳意滅賊。下令限三日取噶爾厓。總兵任舉參將賈國良俱戰死。自是不敢專軍事。仍倚張廣泗辦賊。廣泗輕訥親不知兵。而氣凌己上。故以軍事推讓。而實困之。將相不和。人心解體。而廣泗所信用奸人良爾吉。本與莎羅奔之女阿扣私通。莎羅奔令與阿扣爲夫婦。專伺軍中動息。故得爲備。岳鍾琪屢以爲言。廣泗信漢奸王秋

言不聽。岳鍾琪密奏其事。會訥親亦劾廣泗。老師糜餉各事。帝命革廣泗職。拿交刑部治罪。

調滿洲京兵雲梯兵及東三省兵共五千名。赴大金川軍營聽用。

命傅恆爲保和殿大學士。兼戶部尙書。

辛巳。命大學士來保軍機處行走。

十月己酉。命尹繼善協辦大學士。

十一月。命協辦大學士尹繼善軍機處行走。

丙子。諭向來各處本章。有題本奏本之別。地方公事。則用題本。一己之事。則用奏本。題本用印。奏本不用印。其式沿自前明。蓋因其時綱紀廢弛。內閣通政司。借公私之名。以便上下其手。究之同一入告。何必分別名色。著將向用奏本之處。概用題本。以示行簡之意。

十二月乙酉。加經略大學士傅恆太保銜。

命署刑部尙書阿克敦暫行協辦內閣大學士事務。

大學士張廷玉等以票擬錯誤。銷去加級及革職降級留任有差。

張廣泗被逮至京。帝御瀛臺親訊。廣泗抗辨不服。帝怒。斬之。廣泗既誅。帝命訥親明白回奏。訥親奏中呶呶萬言。無一要領。惟急於見帝自陳。帝命大學士傅恆訊明。以其祖遏必隆之刀。郵寄軍前賜死。

諭本朝由內三院改設內閣大學士。未有定數。康熙年間率用四員。至雍正以來。多至六員。或增置一二協辦。嗣後定爲滿漢各二員。其協辦滿漢或一員或二員。因人酌派。又大學士官銜例兼殿閣。會典所載四殿二閣。未爲畫一。其中和殿名從未有用者。不必開載。著增入體仁閣。爲三殿三閣。

大學士高斌因事革職。仍留河道總督任。

乾隆十四年己巳正月。命大學士張廷玉四五日一至內廷。以備顧問。

丁巳。命內大臣傅爾丹。尙書達爾黨阿。舒赫德。總督尹繼善。策楞。俱參贊軍務。

革班第職。仍署理四川巡撫。效力贖罪。

裁左春坊滿漢左諭德二缺。

命經略大學士傅恆班師還朝。傅恆至軍。斬良爾吉阿扣王秋。以斷內應。增調隣省兵。刻期進剿。奏言。金川之事。從前張廣泗每得一礮。卽撥兵防守。致兵力日殫。殊爲失計。擬俟大兵齊集。四面布置。出其不意。直搗巢穴。取其渠魁。定於四月間報捷。帝以土司小醜。勞師二載。誅兩大臣。又失任舉良將。已不釋於懷。及聞其地險力艱。不足殫師旅。益恨訥親張廣泗之不以實聞也。且屢奉皇太后息兵寧邊之諭。故有是詔。傅恆又以功在垂成。棄之可惜。入奏。帝恐傅恆守將在外。君命有所不受之說。復寄諭。反覆數千言。時傅恆及岳鍾琪兩路。連克碉寨。軍聲大振。莎羅奔郎卡聞大兵決計深入。又斷內應。遣人詣岳鍾琪乞降。鍾琪輕騎徑抵其巢。莎羅奔見其親至。則大喜。悉聽約束。頂佛經立誓。從鍾琪坐皮船出洞。傅恆升幄。宣詔赦其死罪。二月癸辰。傅恆捷奏至京師。帝大喜。傅恆先已封公。封岳鍾琪爲

三等公。其參贊諸大臣。交部議敘。

禁各海口銅器出洋。

七月癸丑。帝奉皇太后秋獮木蘭。庚申。駐避暑山莊。

八月辛卯。山西學政德保奏。士子最重經學。而本經尤重。請於歲科正考之日。摘本經一段。開明起止。默寫卷末。如錯落多者。生員不准前列。童生不准入泮。從之。以辦理瞻對土司事。誤報班滾焚斃。賜慶復自盡。

九月庚午。帝還京師。

命揀選翰林院堪勝道府人員。

十一月癸亥。帝以內閣大學士惟史貽直一人。需員協辦。命尙書汪由敦暫在內閣署理。

御史馮元欽奏。請改軍機房爲樞密院。不許。

允大學士張廷玉致仕。廷玉見帝。以世宗遺旨配享太廟爲言。乞帝一言爲券。帝

爲之特頒諭旨。並成詩一章。以安其心。廷玉具摺謝恩。以是早風雪。不親至。令其子張若澄代奏。帝令廷玉明白回奏。旨未下。廷玉次早卽來。帝責軍機漏洩消息。解汪由敦協辦內閣任。御史薛澂因奏廷玉詐僞負恩命。交大學士九卿議奏。尋命削去伯爵。以原銜休致。

乾隆十五年庚午正月。准寧古塔流民入籍。

壬戌。命工部侍郎劉綸軍機處行走。

己巳。命張允隨爲東閣大學士。兼禮部尙書。

二月乙亥。帝奉皇太后巡幸五臺山。

定邊左副將軍固倫額駙超勇親王策凌卒。詔以王奮身血戰。再挫天驕。震威絕徼。爲國家長城。特敕配享太廟。創蒙古諸藩未有之典。並視怡賢親王例。崇祀京師賢良祠。賜諡曰襄。建碑紀功烈。世子成袞扎布奏言。其父遺命。願附葬公主園寢。許之。初。策凌有二子。陷準部中。及與準部議地界。準使哈柳至京師。語及之。欲

以動策凌。策凌厲辭拒折。哈柳意沮。遂定議無踰阿爾泰山。蓋自雍正末年。策凌凡三至京師。敵憚其威重。卒從所議。於是喀爾喀西陲拓地千餘里。帝稱其始終竭誠宣力。忠勤匪懈。爲不負云。

命貝勒羅卜藏署理左副將軍印務。

御史王應綵奏。請敕下內外大臣。細加搜訪遺書。果能斟酌羣言。闡明奧旨者。量予旌獎。從之。

三月己酉。帝奉皇太后還京師。

五月癸丑。以月食。命九卿科道等直陳闕失。

六月。授策凌子成袞扎布爲定邊左副將軍。

七月。四川學政朱荃匿喪不報。賄賣生童。被人參奏。懼罪自盡。報稱落水身故。湖廣總督永興以聞。帝覺其詐。研訊得實。朱荃爲張廷玉兒女親家。帝責其前後庇護。命將所受恩賜物件。一併追繳。

八月壬申。冊立皇貴妃那拉氏爲皇后。

九月壬寅。帝奉皇太后率皇后謁泰陵。己酉。駐正定府。丁巳。駐彰德府。辛酉。駐百泉。幸白露園。丙寅。渡河。

十月庚午。帝幸嵩陽書院。辛未。詣中嶽廟。登嵩山。丙子。駐開封府。丁丑。閱兵。戊寅。幸古吹臺。

十一月壬寅。帝還京師。

初、西藏郡王頗羅鼐卒。其子珠爾默特那木扎勒襲封。以駐藏大臣不便於己。先奏罷駐防之兵。陰通書準噶爾。請兵爲外應。旋襲殺其兄。揚言準部兵至。聚黨二千謀變。駐藏都統傅清左都御史拉布敦覺其逆謀。欲先發。而左右無一兵。乃以計誘至寺中。登樓手刃之。傅清拉布敦旋爲其黨卓呢羅卜藏扎什所害。帝命四川總督策楞提督岳鍾琪引兵入藏。會達賴喇嘛使番部公爵班第達攝藏事。擒逆黨以聞。策楞等因奏止所調大兵。止帶八百人前進。詔以二臣先事靖變。贈一

清史綱要 卷六
等伯。卽以其地立雙忠之祠。又封傅清子明仁。拉布敦子根敦爲一等子。世襲罔替。

命班第爲駐藏副都統。自珠爾默特亂後。藏中始不封汗王貝子。以四噶布倫分其權。而總於達賴喇嘛。增駐藏大臣兵千有五百。

命舒赫德仍在軍機處行走。

乾隆十六年辛未。正月辛亥。帝奉皇太后南巡。

二月丙子。渡河。閱天妃閣。丁丑。閱高家堰。癸巳。至蘇州府。

準噶爾使臣額爾欽等入貢方物。

三月戊戌。帝幸杭州府。癸卯。渡錢塘江。乙巳。祭禹陵。丙午。還駐杭州府。癸丑。駐蘇州府。

太學士張允隨卒。予諡文和。

辛酉。帝至江寧府。

乙丑。殺己革駐藏大臣紀山。以策楞等奏其在藏時。令兵丁演戲。時與珠爾默特宴會臨觀。日在醉鄉。並送珠爾默特八轎。令轎夫前往教演。番奴擡轎。以肆其志。帝責其喪心無恥。曲意逢迎。故也。

丙辰。帝渡江。

命原任大學士陳世倌入閣辦事。

四月癸酉。帝閱蔣家壩。甲戌。渡河。丙戌。駐泰安府。

兩廣總督陳大受等。奏廣東通省。向止設學政一員。嗣因士習囂陵。雍正七年。添設肇高學政。今請照舊統設一員。從之。

五月庚子。帝還京師。

壬戌。停止直省知縣三年行取之例。

六月。授保舉經學之吳鼎梁錫璵爲國子監司業。

七月壬申。帝奉皇太后秋獮木蘭。戊寅。駐蹕暑山莊。

八月丁巳。帝還京師。

九月。雲貴總督碩色奏。滇省傳播偽撰孫嘉淦本稿一紙。語涉誣謗。山東巡撫準泰等。以設法消弭革職拿問。命尙書舒赫德赴江南查辦。旋準泰等俱寬宥釋放。庚寅。兩廣總督陳大受卒。予諡文肅。大受爲方苞弟子。嘗言歷事多而利害明。則受病卽在此。苞嘆爲名言。謂可爲庸庸者之藥石云。

十二月丙午。禁苗人充補苗疆額兵。

乾隆十七年壬申。六月丁未。御試翰林詹事等官。擢汪廷瓊等三員爲一等。試滿洲由部院改入翰林詹事等官。擢德爾泰爲一等。餘各升黜留館有差。

七月丁丑。帝奉皇太后秋獮木蘭。

九月庚午。駐蹕避暑山莊。己卯。還京師。

庚辰。協辦大學士吏部尙書梁詩正奏請終養。允之。以孫嘉淦爲吏部尙書。協辦大學士。

十月戊子。賜秦大士等二百四十一人進士及第出身有差。

乾隆十八年癸酉。正月。命莊親王允祿履親王允禩和親王弘晝爲議政大臣。

二月。僞造奏稿撫州衛千總盧魯生。凌遲處死。子盧錫齡盧錫榮均斬監候。

五月丙辰。裁欽天監滿漢監副各一。增西洋監副一。

八月戊戌。帝奉皇太后秋獮木蘭。甲辰。駐避暑山莊。

以河員虧帑事發。河督高斌張師載俱革職留工。效力贖罪。

以銅山縣隄工潰決。殺貽誤工程之同知李焯守備張賓。

十月甲午。帝還京師。

十二月丁亥。協辦大學士吏部尙書孫嘉淦卒。予諡文定。

庚寅。命戶部尙書蔣溥協辦大學士。

命尙書舒赫德赴鄂爾坤軍營辦理軍務。

乾隆十九年甲戌。三月。四川提督岳鍾琪。因逆匪陳琨一案發覺。力疾前赴重慶。

督緝要犯。擒獲過半。中途病故。四川總督黃廷桂以聞。帝以岳鍾琪宣力有年。勞績懋著。免其子岳濬巡撫任內應完庫項。予諡襄勤。

四月。改成袞扎布為喀爾喀副將軍。以策楞為定邊左副將軍。

閏四月。賜莊培因等二百三十三人進士及第出身有差。

五月甲申。帝奉皇太后率皇后。至盛京謁陵。庚寅。駐避暑山莊。

以杜爾伯特台吉車凌車凌烏巴什等。皆準部渠帥。率眾來歸。封車凌為親王。車

凌烏巴什為郡王。其他封貝勒貝子公扎薩克有差。

壬辰。以厄魯特公巴圖孟克為北路參贊大臣。瑪什巴圖為西路參贊大臣。

以來年征準噶爾。命北路派兵三萬。西路派兵二萬。採買駝馬羊隻。聽候出師。

諭內扎薩克喀爾喀王貝勒等整兵聽調。命侍郎兆惠往歸化城辦運軍米。

六月壬申。命雅爾哈善署理戶部侍郎。在軍機處行走。

七月壬午。帝自避暑山莊至盛京。

癸未。以塔勒瑪善扎勒杭阿爲北路參贊大臣。

策楞等奏。準部阿睦爾撒納來降。阿睦爾撒納者。故拉藏汗之孫。丹衷之子。而策妄喇布坦之外孫也。丹衷妻策妄之女。先生子班珠爾。而丹衷被戮。復有遺腹。改適輝特部酋。生阿睦爾撒納。方乾隆十年。噶爾丹策零死。次子那木扎爾嗣汗位。童昏無行。爲其女兄之夫所弑。而立其庶兄喇嘛達爾扎。欲誅阿睦爾撒納。反爲所襲殺。而擁立準部同族台吉大策零之孫達瓦齊。阿睦爾撒納恃功驕恣。達瓦齊欲誅之。阿睦爾撒納遂與納默庫班珠爾二台吉。共率所部兵二千口二萬。東奔叩關內附。

八月甲寅。帝駐吉林。乙卯。詣溫德亨山。丙辰。渡松花江。辛巳。謁永陵。丙戌。駐盛京。以將軍策楞尙書舒赫德。在軍營乖戾僨事。俱革職效力贖罪。抄沒家產。其子分別充軍監禁。

辛丑。授班第爲定邊左副將軍。鄂容安爲參贊大臣。

癸卯。命瑪什巴圖巴圖孟克赴西路軍營。

十月丙辰。帝奉皇太后還京師。

十一月。以收服烏梁海功。加貝勒青滾雜卜郡王銜。公車布登扎布貝子銜。

乙酉。帝幸避暑山莊。丁亥。輝特台吉阿睦爾撒納等於廣仁嶺迎駕。

封輝特台吉阿睦爾撒納爲親王。訥默庫班珠爾俱郡王。

召班第來京。以阿睦爾撒納暫署將軍。額駙色布騰巴勒珠爾協辦。

命杜爾伯特部落以親王車凌爲左翼盟長。貝勒色布騰爲副盟長。貝勒車凌孟克爲協理盟長。郡王車凌烏巴什爲右翼盟長。郡王訥默庫爲副盟長。

以輝特親王阿睦爾撒納爲北路參贊大臣。杜爾伯特郡王訥默庫爲西路參贊大臣。以將用兵準噶爾故也。

戊戌。帝還京師。

清史綱要卷之六終

清史綱要卷之七

乾隆二十年乙亥二月初。準部內亂。其宰桑薩喇爾杜爾伯特台吉三車稜先後來降。及阿睦爾撒納至。帝久知其爲部衆所畏服。可驅策嚮導。遂有乘機大舉之意。命各大臣集議。諸臣懲於雍正九年博克託嶺之敗。以深入爲險。惟大學士傅恆主用間出征。與帝意合。旣而準部驍將瑪木特亦脫身來歸。遂定議以二月分兩路出師。班第爲定北將軍。出北路。阿睦爾撒納副之。額駙科爾沁親王色布騰巴勒珠爾郡王品級青滾雜卜內大臣瑪木特將軍阿蘭泰爲參贊。永常爲定西將軍。出西路。薩喇爾副之。郡王班珠爾貝勒品級扎拉豐阿內大臣鄂容安爲參贊。兩副將軍各領前鋒三千先進。將軍參贊繼之。降人三車稜納默庫等。皆以所部兵從。兩路兵各二萬五千。西路出巴里坤。北路出烏里雅蘇臺。各攜兩月糧。約會於博羅塔拉河。

三月。湖南學政胡中藻著堅磨生詩。中多謗訕語。拏交刑部治罪。侍郎張泰開爲

之作序。巡撫鄂昌與之唱和。俱交部嚴審具奏。尋大學士九卿翰詹科道等奏稱。胡中藻合依大逆凌遲處死。男十六歲以上皆斬立決。張泰開應照知情隱匿律斬立決。帝命胡中藻斬立決。其子特從寬免。張泰開序文查係胡中藻自作。從寬免其緣坐。鄂爾泰嘗贊賞胡中藻之詩。又以其姪鄂昌得罪。命撤出賢良祠。賜鄂昌自盡。

四月壬子。致仕大學士張廷玉卒。仍命配享太廟。予諡文和。

戊辰。命翰林院侍講全魁編修周煌冊封琉球國王尙穆。

五月庚寅。諭八旗滿洲。須以清語騎射爲務。不在學文。如有與漢人互相唱和。較論同年行輩往來者。一經發覺。決不寬貸。

辛卯。命黃廷桂爲武英殿大學士。兼吏部尙書。仍留四川總督任。

壬辰。阿睦爾撒納以大兵已抵伊犁。入奏。準部自數月來。降者相繼。我師遂直抵博羅塔拉河。河距伊犁三百餘里。達瓦齊素縱酒不設備。至是。倉卒急遣親信兩

宰桑出令箭徵兵。而自率宿衛親兵萬人。走保伊犁西北百八十里之格登山。阻淖爲營。我師遮獲其徵兵之宰桑。具悉國中解體狀。士氣倍奮。爭渡伊犁河。長驅追襲。將及格登山。夜遣降人阿玉錫等率二十餘騎。往覘道路。阿玉錫卽乘夜突搗其營。拍馬橫矛。搥纛大呼。衆瓦解。達瓦齊以二千餘人宵遁。餘皆不戰降。黎明。我二十餘騎遂收其衆七千餘。還大營。達瓦齊踰冰嶺南走回疆。其下半途逃散。僅餘百騎。以烏什城阿奇伯木克霍吉斯爲己所善。投之。而霍吉斯已承我將軍檄。卽執之以獻。並獲前青海叛人羅卜藏丹津。獻俘京師。帝御午門樓受之。皆赦其死。論功行賞。首獎大學士傅恆襄贊之功。再加封一等公。辭不受。班第封一等誠勇公。薩喇爾一等超勇公。而阿睦爾撒納晉封雙親王。食親王雙俸。其後達瓦齊霍吉斯亦皆賜封親王郡王。入旗籍。

命尙書達爾黨阿協辦大學士事務。

六月癸卯。命四衛特照喀爾喀例。每部落設盟長及副將軍一人。

賞策楞都統銜。駐巴里坤辦理事務。

命和託輝特郡王青滾雜卜等。管理新降烏梁海人戶。

八月丁未。帝奉皇太后秋獮木蘭。

九月壬午。駐避暑山莊。

癸未。封噶勒藏多爾濟爲綽羅斯汗。車凌爲杜爾伯特汗。沙克多爾曼濟爲和碩特汗。巴雅爾爲輝特汗。

十月甲寅。帝還京師。

阿睦爾撒納作亂。將軍班第尙書鄂容安死之。薩喇爾被執。初。準噶爾舊有四衛拉特。四衛拉特之分部。各有其汗。非有君臣之分也。自綽羅斯渾台吉汗強盛。伊犁始爲四部盟長。抗衡中國者數世。帝欲俟事定。仍衆建而分其力。而阿睦爾撒納欲爲四部總台吉。專制西域。時班第鄂容安留伊犁籌善後。而阿睦爾撒納輒隱以總汗自處。擅誅殺擄掠。擅調兵。不服賜衣翎頂。不用副將軍印。自用渾台吉

菊形篆印。又陰使哈薩克布魯特流言。非已總四部。邊不得安。將軍參贊以聞。先是。帝令阿睦爾撒納。九月至熱河。行飲至禮。阿睦爾撒納於八月十九日行至烏隆古河。距其扎布堪河舊游牧不遠。乃詭言暫歸治裝。遂由額爾齊斯河。間道北逸。遣使迎其孥於扎布堪河。會帝早疑其有異。密諭烏里雅蘇軍營。並其弟班珠爾收之。不半日而其使果至。得不遣。阿遂日出煽亂。伊犁諸喇嘛宰桑。劫掠軍臺。蠶起應之。時大兵已撤。僅五百兵留伊犁。歸路斷。又厄魯特與之不合者。皆先以計遣入朝。所留皆其黨羽。班第鄂容安力戰走二百餘里。被圍死之。時阿黨不過二千餘。屯博羅塔拉河。各部皆不敢從。而將軍永常西路勁兵數千。屯烏魯木齊附近。台吉宰桑數千。咸投赴。永常不知驅策用之。却自木壘南退軍。巴里坤。并移軍糧於哈密。故北路無聲援。阿黨益猖獗。帝逮永常治罪。以策楞代之。永常道死。玉保富德達爾黨阿爲參贊。

乾隆二十一年丙子。正月己巳。命舒赫德協同將軍成袞扎布。駐烏里雅蘇臺。

初、阿睦爾撒納入覲。班第令喀爾喀親王額林沁多爾濟與之同行。阿將遁走。以副將軍印交額林沁。使先行。有降人首其謀。額林沁不信。竟縱之去。帝怒。賜自盡。授蒙古公瑪什巴圖爲副盟長。

致仕大學士阿克敦卒。予諡文勤。

二月辛亥。帝謁孔林。

三月己巳。至曲阜。謁孔子廟。庚午。謁孔林。丁酉。還京師。

丁亥。策楞等奏大兵復伊犁。阿穆爾撒納遁去。

四月。命陝甘總督黃廷桂赴巴里坤。

命戶部尙書阿里袞軍機處行走。

癸亥。命侍郎雅爾哈善劉綸俱還部辦事。不必兼軍機處行走。侍郎裘曰修在軍機處行走。

五月癸酉。命尙書阿里袞副都統銜公明瑞往軍營。在領隊大臣上行走。

褫策楞玉保職。玉保引軍至特克勒河。探知阿逆僅距一程。急進可追及。忽有報台吉諾爾布已禽阿逆來獻者。玉保遂駐軍待之。先以紅旗報捷於策楞。策楞據以入奏。不知報禽賊者。卽賊所遣以緩師也。二月。兵出伊犁。阿逆遁入哈薩克。將軍參贊互相咎。託言馬力竭。頓師伊犁不進。帝以二人非任事才。乃命達爾黨阿哈達哈代之。兼命兆惠自巴里坤赴援。

七月己巳。定革職無餘罪人員。概准捐復例。

八月癸丑。帝奉皇太后秋獮木蘭。壬戌。駐波羅河屯。

九月丁丑。駐安巴糾和羅大營。庚寅。駐避暑山莊。

授杜爾伯特親王伯什阿噶什爲盟長。貝子烏巴什爲副盟長。

閏九月甲寅。帝奉皇太后還京師。

十月乙酉。致仕大學士福敬。謚文端。

十一月。命侍郎裘日修赴西路軍營。

丁巳。以博勒奔察爲內大臣。同侍衛順德訥赴巴里坤軍營。

命甘肅巡撫吳達善赴巴里坤督辦軍需。

十二月丙戌。諭達爾黨阿不必協辦大學士。刑部尙書鄂彌達著協辦大學士。初。和託輝特部郡王青滾雜卜。與阿逆交結背叛。命將軍成袞扎布派兵追捕。至是。奏報擒獲。自成袞扎布以下恩賞封爵有差。

乾隆二十二年丁丑。正月。以莽古賚爲參贊大臣。赴北路軍營。

庚子。以哈寧阿永貴爲北路參贊大臣。

癸卯。帝奉皇太后南巡。

杜爾伯特親王伯什阿噶什卒。無子。以其兄子達巴都噶爾達瓦濟特俱授爲扎薩克。

以內閣學士阿思哈爲北路參贊大臣。

改會試二場表文。爲五言八韻唐律一首。

二月丁卯。帝渡河。至天妃闡。乙亥。渡江。甲申。幸蘇州府。己丑。幸杭州府。達爾黨阿之代策楞領兵。由西路擊敗哈薩克二千人。阿逆易服潛遁。我兵追及。相隔一谷。僅二三里。倉猝不及馳載。乃使哈薩克人來言。卽欲禽獻。但需其汗至。乞暫緩師待。達爾黨阿信之。遂下令駐軍。阿逆旋復颺去。哈達哈出北路。遇阿布賚兵千餘於巴顏山。不迎擊。從征降人宰桑見兩將軍見賣無能。皆輕之。綽羅斯特輝特二部及哈薩克先叛。都統和起被誘殲焉。阿逆聞四部搆亂。自哈薩克歸。會諸部於博羅塔拉河。欲自立爲汗。準部復大擾。策楞玉保逮問。亦於途被殺。時定邊右副將軍兆惠以千五百兵駐防伊犁。聞變。自濟爾噶朗河轉戰而南。沿途殺敵數千。於二十二年正月。至烏魯木齊。敵衆皆會。連日數十百戰。至特訥格。不復能衝擊。乃結營自固。會帝先命侍衛圖倫楚率巴里坤兵往迎。圍乃解。兆惠得新兵。復往剿巴雅爾部落。始回巴里坤。

三月己酉。帝幸江寧府。癸丑。渡江。己未。渡河。

命原任大學士史貽直仍補授大學士。入閣辦事。黃廷桂以大學士管理陝甘總督事務。

四月。有于榮煥者。倚恃內監。在街市中戲侮巡檢。又於公堂咆哮。巡檢張若瀛按法懲治。總督方觀承參奏。帝命將于榮煥發往黑龍江。命凡內監私人有在外生事者。聽人懲責。

辛未。帝至闕里。釋奠先師孔子。

命史貽直仍以文淵閣大學士兼吏部尚書。

議大剿準部。定邊左副將軍成袞札布出北路。右副將軍兆惠出西路。會諸部落自相吞噬。綽羅特汗爲其兄子噶爾布所篡。台吉達瓦旋殺噶爾布。兆惠兵至。皆敗走。逆酋先後授首。惟阿逆未獲。兆惠富德窮追至左哈薩克。時哈薩克汗阿布賚已與阿逆積釁。且懼招大兵。遣使入貢。誓禽阿逆以獻。適阿逆率二十人往投。阿布賚先使人收其馬。阿逆驚。攜八人徒步夜走俄羅斯界。帝命移檄索之。會阿

逆患痘死移尸近邊。命喀爾喀親王侍郎三泰等馳驗以聞。成袞札布以定邊左副將軍歸鎮烏里雅蘇臺。兆惠率兵四千再剿厄魯特餘黨。

七月。先是布政使彭家屏奏河南巡撫圖爾炳阿匿災不報。復有夏縣民人遮道陳訴。帝意其有指使之入。訊出生員段昌緒等。及地方官往查拏。於昌緒臥室搜出吳三桂偽檄。又訊得彭家屏以收藏明末野史。又所刻族譜取名大彭統紀。遂賜家屏自盡。殺昌緒等。圖爾炳阿以緝邪功復任。

戊申。帝奉皇太后秋獮木蘭。

八月。治前歲用兵準夷將帥失機貽誤之罪。達爾黨阿哈達哈俱革職發往熱河披甲。效力行走。

九月辛丑。帝駐避暑山莊。乙巳。還京師。

以叛賊尼瑪及其子袞楚克車凌。於故將軍和起墓前凌遲正法。

辛丑。雲貴總督恆文。坐令屬員買金短發金價。及縱容家人勒索門禮。賜自盡。

清史綱要 卷十
十月。以雅爾哈善署定邊右副將軍。命阿里袞由珠勒都斯接應成袞札布臺站。賜吐魯番貝子額敏和卓敕書。並參贊回部軍務。

十一月。山西布政使蔣洲以虧帑伏法。洲。大學士蔣廷錫子也。

禁各省上司勒薦幕友。

十二月。癸酉。封成袞札布之子瞻楚布多爾濟爲世子。

甲戌。命各省總督保薦堪管專閫人員。

乙亥。准呂宋船於廈門貿易。

乾隆二十三年戊寅。正月。以雅爾哈善爲靖逆將軍。額敏和卓哈寧阿爲參贊大臣。順德訥愛隆阿玉素布爲領隊大臣。進兵回部。回部在天山南路。卽漢書城郭三十六國。東西六千餘里。南北千餘里。唐以前皆佛教。其以回回著者。則萌芽於隋唐。而盛於元以後。回部舊汗。本元太祖次子哈薩岱之裔。世封回部。及明末瑪墨特自西方至。各回城靡然從之。是爲霍集占兄弟之高祖。後值厄魯特強盛。盡

執元裔諸汗。遷居天山以北。並質回教酋於伊犁。康熙三十五年。噶爾丹敗後。其質伊犁之回酋阿布都實特。自拔來投。聖祖優卹之。遣人護至哈密。歸諸葉爾羌。是爲霍集占兄弟之祖。至其子瑪罕木特。噶爾丹策零復襲執而幽之。并羈其二子。長曰布那敦。次曰霍集占。卽所謂大小和卓木者也。乾隆二十年。大兵定伊犁。釋大和卓木。以兵送歸葉爾羌。使統其舊部。而留小和卓木。禮之使居伊犁。掌回務。及阿逆之變。伊犁俶擾。小和卓木率衆助逆。以與勤王之台吉宰桑戰。踰年。大兵再定伊犁。小和卓木遁歸。始自疑貳。將軍兆惠奏遣副都統阿敏道往招撫。爲小和卓木所戕。遂自立爲巴圖爾汗。回戶數十萬皆靡。惟庫車拜城阿克蘇三城之阿奇伯木克鄂對等。素悉小和卓木忍驚。且懼我兵威。皆奔伊犁。帝乃以回酋霍集占罪狀。宣諭回部各城。出兵討之。

二月。諭軍機大臣等。滿洲大臣奏事。稱臣稱奴才不一。著傳諭。嗣後頒行公事摺奏。稱臣。請安謝恩尋常摺奏。仍稱奴才。以存滿洲舊體。

大學士陳世倌以年老乞致仕。允之。世倌旋卒。予謚文勤。

三月乙巳。御試翰林詹事等官。擢王鳴盛等三員爲一等。試由部院改入翰林等官。擢德爾泰爲一等。餘各升黜留館有差。

四月。御史吳龍見請鄉會試第一場四書文後。用性理論一道。從之。

七月庚子。帝奉皇太后秋獮木蘭。

革雅爾哈善職。令納穆札爾爲靖逆將軍。三泰爲參贊大臣。雅爾哈善將滿漢兵萬餘進攻庫車。和卓木兄弟聞之。由阿克蘇之戈壁來援。我領隊大臣愛隆阿等迎擊半途。先殲其前隊三千於和託鼐。又禽斬千有六百於城外鄂根河。和卓木兄弟斂餘兵八百入保庫車城。雅爾哈善不爲備。終日棋奕。亦不巡壘。敵以四百騎由北山口遁。守西門之都統順德訥聞報。尙以昏夜不發兵。及曉始遣百人追之。則已渡鄂根河。去橋斷後。雅爾哈善提督馬得勝攻城不克。官兵六百殲焉。其酋阿布都復乘夜突圍遁走。帝怒。殺順德訥馬德勝。命將軍兆惠移師討之。雅爾

哈善旋亦正法。

九月乙巳。帝還京師。

十一月。封大學士兼管陝甘總督黃廷桂爲三等伯。以西陲用兵。籌辦軍需。動協機宜也。

乾隆二十四年己卯。正月。大學士兼管陝甘總督黃廷桂卒。予謚文襄。以蔣溥補授東閣大學士。仍兼管戶部尙書。劉統勳協辦大學士。

己酉。致仕協辦大學士三泰卒。予謚文恭。

四月辛酉。以旱。命刑部清理庶獄。

乙丑。命九卿極言利弊。

七月壬子。帝奉皇太后秋獮木蘭。

庚午。兆惠等以撫定喀什噶爾二城入奏。並陳駐兵分防各事宜。初兆惠率師抵庫車城。兩和卓木奔阿克蘇。其伯克霍吉斯。卽前擒獻達瓦齊受封者也。閉城不

納。給令赴烏什。烏什亦不納。於是小和卓木奔葉爾羌。大和卓木奔喀什噶爾。我師抵葉爾羌。以兵少。不能攻城。欲伺間出奇。先營城東。隔河有水艸處。所謂黑水營也。兆惠既分兵八百。使副都統愛隆阿扼喀什噶爾援路。又偵知敵衆在城南英奇盤山下。乃留兵守黑水營。而率千餘騎自東而南。甫渡四百騎。城中敵出五千來截。我兵方奮突其陳。敵步兵萬餘繼之。敵騎復張兩翼攻圍我。使我隔河兵不能救。我兵人自爲戰。殺敵千計。浮水還營。總兵高天喜等戰歿。敵逾河來攻。我兵且戰且築壘。敵不能陷。相持三閱月。將軍納穆札爾參贊三泰。於途中遇敵陣亡。富德在北路。聞黑水被圍。冒雪赴援。渡葉爾羌河。距黑水軍尙三百里。敵愈衆。不能進。會巴里坤大臣阿里袞。以兵六百夜至。乃與富德大呼馳薄。直壓敵壘。敵不知官兵多少。自相格殺。潰遁。我師長驅而進。兆惠亦勒兵潰圍。殺敵千餘。盡焚其壘。敵大敗入城。兩軍會合。振旅還阿克蘇。乃議兩路進師。兆惠由烏什。取喀什噶爾。富德由和闐。取葉爾羌。兩和卓木各棄城遁去。喀什噶爾葉爾羌皆復。

庚申。帝奉皇太后駐避暑山莊。己巳。還京師。

命參贊大臣阿里袞留駐葉爾羌。

十月庚子。富德等奏。巴達克山素勒坦沙。獻回酋霍集占首級。全部納款。二和卓木之踰葱嶺西遁。往赴巴達克山。我兵追至伊西洱庫河。乃巴達克山界也。兩涯皆山。曰和什珠克嶺。大和卓木先以家屬保河西嶺。爲走計。小和卓木以萬衆據北山。及迤東諸峯。決死戰。富德先令阿里袞等由南岸趨西嶺。而自擊東峯之敵。仰攻逾時。未克。乃選銃手數十。緣山北巔俯擊之。而阿里袞軍亦從南岸山上。以火器遙擊山北之敵。其山麓又狹。逼水僅容單騎。敵輜重徒屬擁塞。我兩軍分扼其走路。敵無所遁。乃令鄂對霍吉斯樹回纛。大呼招降。降者蔽山而下。聲如奔雷。小和卓木雖手刃之。不能止也。凡降回衆萬有二千。巴達克山酋素勒坦沙。與戰於阿爾渾楚嶺。禽其兄弟。將軍檄索之。函首軍門。回部平。

乾隆二十五年庚辰。正月庚戌。命烏嚕木齊屯田。

丙辰。巴達克山素勒坦沙等遣使入覲。

定邊將軍兆惠等函送回酋霍集占首級。並俘回酋捫多索丕等。至京。丁巳。帝御午門樓行獻俘禮。命宥捫多索丕等罪。

壬戌。命在京安插回人。另編佐領。

二月。命富德軍機處行走。

六月。舊制。安徽布政使隨督臣駐紮江寧。文移往返需時。命安徽藩司回駐安慶。於江蘇增設藩司一員。

八月己丑。帝奉皇太后秋獮木蘭。

壬辰。以阿桂總理伊犁事務。授爲都統。

命侍郎于敏中軍機處行走。

九月己巳。帝奉皇太后駐避暑山莊。

十月辛卯。帝還京師。

乾隆二十六年辛巳。正月壬寅。紫光閣落成。賜大學士公傅恆以下畫像諸功臣。並文武大臣蒙古王公大臣台吉等一百七人宴。

二月庚辰。帝奉皇太后謁泰陵。並西巡五臺山。

三月。始令新進士引見時。酌用中書數員。與舉人中書一體補用。以前此專用舉人。遇會試之年。俱入閣應試。致辦事乏人故也。

乙巳。帝幸正定府閱兵。壬子。幸平陽淀行圍。丙辰。還京師。

四月。大學士蔣溥卒。予諡文恪。

甲午。賜王杰等二百一十七人進士及第出身有差。

五月丁未。命劉統勳爲東閣大學士。兼禮部尙書。以梁詩正爲吏部尙書。協辦大學士。

六月乙未。弛貴州民苗結婚禁。

七月辛丑。以兆惠協辦大學士。

丁未。協辦大學士鄂彌達卒。予諡文恭。

壬子。命減緩決三次以上人犯罪。

癸丑。帝秋獮木蘭。丙寅。駐避暑山莊。

十月辛未。帝還京師。

十二月戊子。命外官迴避內外兄弟。

乾隆二十七年壬子。正月丙午。帝奉皇太后南巡。

二月壬申。渡河。庚辰。閱京口兵。辛巳。幸焦山。乙酉。幸蘇州府。

三月甲午。幸杭州府。乙未。幸海寧。閱海塘。丙午。自杭州回鑾。戊午。幸江寧府。壬戌。

渡江。

四月庚午。渡河。癸酉。命莊親王允祿等奉皇太后由水路迴鑾。帝登陸。由徐州。閱

河。丁丑。閱嶧山湖。庚辰。謁先師廟。辛巳。謁孔林。壬午。詣岱廟。

五月丁酉。帝還京師。

七月戊辰。帝奉皇太后秋獮木蘭。

八月庚子。駐避暑山莊。

戊申。諭督撫同省。不得交布政使攝篆。著爲例。

九月庚午。帝奉皇太后還京師。

十月乙巳。設伊犁將軍。以明瑞爲之。又設伊犁參贊領隊大臣。

乾隆二十八年癸未。正月壬申。命尙書阿桂軍機處行走。

授工部侍郎納世通爲參贊大臣。駐喀什噶爾。總理回疆事務。

內大臣富德以婪贓逮問。旋命寬免。

四月壬子。賜秦大成等一百八十八人進士及第出身有差。

五月。翰詹諸臣大考卷始用彌封。從御史王蘇德奏也。

果親王弘瞻有罪。革去王爵。賞給貝勒。永遠停俸。

庚午。試翰詹等官。擢王文治等三員爲一等。餘升黜留館有差。試滿洲由各部院

升轉翰林詹事等官。擢哈靜阿爲一等。餘罰俸休致有差。

大學士史貽直卒。予諡文靖。

甲戌。帝奉皇太后秋獮木蘭。

六月。以阿桂在伊犁辦事妥協。將其一族。由正藍旗擡入上三旗。

命梁詩正爲東閣大學士。兼吏部尙事。以戶部尙事劉綸協辦大學士。

九月丙子。帝奉皇太后還京師。

十月壬辰。定州縣無故赴省。及久留省會。參處例。

禁部院司官見堂官。輒屈一膝。及因有懇求之事。免冠叩首。又途次相遇。有彼此乘馬。屬官竟行下馬者。旋又命蒙古王公見各大臣。不得屈膝。

十一月丁卯。大學士梁詩正卒。予諡文莊。

己卯。命楊廷璋爲體仁閣大學士。兼吏部尙書。仍留閩浙總督任。

十二月甲申。申誠疆吏巡歷地方。務輕騎減從。

乾隆二十九年甲申。二月己酉。命大學士等揀選翰林堪充道府人員。

三月。武英殿大學士來保卒。予諡文端。

命陝甘總督由肅州移駐蘭州。裁甘肅巡撫。

四月壬午。以尹繼善爲文華殿大學士。仍留兩江總督任。

七月辛亥。大學士閩浙總督楊廷璋。以收受洋船陋規解任。賞給散秩大臣。命楊應琚爲東閣大學士。仍留陝甘總督任。以陳宏謀協辦大學士。

丁卯。帝奉皇太后秋獮木蘭。癸酉。駐避暑山莊。

八月戊戌。自避暑山莊巡幸木蘭行圍。

十月丙戌。還京師。

十一月戊申。命重修大清一統志。

協辦大學士戶部尙書兆惠卒。予諡文襄。

丁卯。以阿里衮爲戶部尙書協辦大學士。

乾隆三十年乙酉。正月癸丑。劉綸丁憂。命刑部尙書莊有恭協辦大學士。

壬戌。帝奉皇太后南巡。

二月戊子。渡河。丙申。渡江。

閏二月丙午。幸蘇州府。辛亥。閱海塘。壬子。幸杭州府。

庚申。命阿桂明亮赴伊犁辦事。命額爾景額總理軍務。明瑞節制各城官兵。

三月丙子。帝幸焦山。辛巳。駐江寧府。丙戌。祭江神。帝奉皇太后渡江。乙未。渡河。

召尹繼善入閣辦事。以高晉爲兩江總督。

烏什回人作亂。命納世通卜塔海俱於軍前正法。蘇成之子發往伊犁當差。烏什在庫車西北千里。戶口數萬。準噶爾敗。其阿奇木伯克霍吉斯。俘達瓦齊以獻。受王封。及二和卓木之亂。霍吉斯頗持兩端。帝恐其反覆。不可專任。召入京。而以哈密伯克阿布都拉代之。阿布都拉暴戾無親。辦事大臣蘇成素憤憤不治事。又酗酒宣淫。甚至留各伯克妻於署。而令兵役裸逐爲樂。乾隆二十九年二月。解送沙

棗樹。昔派回戶二百四十人。相聚謀變。一回奔告阿布都拉。阿布都拉斥逐之。西城回戶不願從亂。相率走投。駐劄大臣署。亦叱拒不納。是夕亂作。阿布都拉蘇成及兵役皆殲焉。阿克蘇辦事大臣卞塔海聞變。卽領兵五百赴烏什。烏什開城出迎。卞塔海卽令舉銃。城復閉。攻之不克。城衆二千餘出戰。卞塔海敗走。喀什噶爾參贊大臣納世通。伊犁將軍明瑞。參贊永貴。各以兵赴援。會圍烏什。納世通初慮明瑞至。使己不得專有其功。行文阻之。繼又知事不易竟。復懇求援助。明瑞以聞。帝以卞塔海納世通二人。節節貽誤。故置極典。專任明瑞辦理。命阿桂前往協辦。四月丁巳。帝駐德州。丙寅。至京師。

六月癸丑。定八旗世職疎遠宗派及駐防兵丁不准承襲例。

七月辛巳。帝奉皇太后秋獮木蘭。駐避暑山莊。

己未。帝自避暑山莊巡幸木蘭行圍。

九月戊寅。明瑞等奏克復烏什城。我兵之圍烏什城。斷其樵牧。敵出城輒敗走。其

會猶劫其衆。不許出降。城南倚山面河。自河至城。茂林橫翳。隔河礮不能及。自五月至七月。攻城未克。敵一夕忽盡伐之。城池豁露。我兵四薄。敵內潰。盡縛首亂以降。官兵入城。殲其黨羽。徙老弱萬餘口。戍伊犁。烏什平。

乙未。帝還京師。

命各直省書院山長。六年期後。著有成效者。量予議敘。改山長稱曰院長。

十月。定舉人大挑例。除新科外。直扣一科。其見任教職者。不得與挑。

乾隆三十一年丙戌。三月。革雲貴總督劉藻職。以楊應琚代之。藻自刎死。初乾隆十八年。有茂隆場商吳尙賢者。說緬入貢。緬酋麻哈祖遣使以馴象塗金塔。敏關求貢。使至京。錫賚如例。而吳尙賢旋被滇吏借事斃諸獄。於是茂隆銀場衆皆散。明年。緬酋爲木疏土司雍籍牙所篡。惟桂家與木邦二土司抗不服。遂治兵相攻。總督吳達善使人誘桂家酋宮裏雁戮之。木邦土司亦兵敗走死。於是緬酋益無忌。復尋及我耿馬孟連諸土司。且以兵來邊外。索木邦逸酋。桂酋妻囊占怨中國。

乃喉孟良酋使內犯車里土司。揚言將渡袞龍江。時承平日久。民不知兵。普洱永昌邊外。一日數驚。總兵劉得成。參將何瓊。福游。擊明浩等。三路皆敗。帝以劉藻本係書生。不知兵事。無意誅之。藻懼不免。於楊應璩未至。乘間自盡。巡撫常鈞以聞。帝命其旅櫬回籍。止可照常人歸葬。不許其家建立墓碑。

四月甲子。賜張書勳等二百一十三人進士及第出身有差。

七月。禁各省首縣代辦上司衙門鋪設。

丙子。帝奉皇太后秋獮木蘭。駐避暑山莊。

壬午。皇后崩。諭飾終典禮。照皇貴妃例行。

十月己亥。帝還京師。

命問擬發遣人犯越獄。卽行正法。

戊午。准各省督撫用紫花印。

十二月辛酉。大清會典成。

乾隆三十二年丁亥。二月癸卯。諭學政升任應否留任。概行請旨。著爲令。
戊午。改直隸州知州爲正五品。

己未。帝幸天津。癸亥。閱淀河。

三月乙丑。閱子牙河堤。

命大學士楊應琚回京。入閣辦事。明瑞補授雲貴總督。前往永昌。接辦軍務。應琚初至雲南。會普洱敵漸退。官兵得以其間收復車里孟良整貝諸地。分隸土目。應琚見事機順利。密奏緬甸可取狀。帝信之。應琚自普洱移駐永昌。移文檄緬。言天兵數十萬陳境上。不降卽進討。緬酋聞。乃大出兵攻木邦景線皆陷之。時副將趙宏榜以兵數百襲克蠻暮之新街。其地扼金沙江水口。緬與中國互市處。據阿瓦上游。爲緬必爭之地。緬以兵溯江而上。抵新街。宏榜燒器械輜重。走還銅壁關。敵數萬尾而入。應琚憂甚。痰疾遽作。詔兩廣總督楊廷璋赴滇。代治應琚軍。又遣侍衛福靈安挾御醫視應琚病。且密察軍事。廷璋至。見緬事未易蕲。遂奏言應琚病

已痊。臣謹歸粵。帝召廷璋還京師。時緬入關肆掠。應琚皆不以聞。但言總兵朱崙等殺敵萬人。戮其大頭目於猛卯。帝視所進地圖。疑緬既屢敗。何以尙踞內土司境。應琚亦劾總兵劉德成。烏爾登額逗留貽誤。先後逮治。並論死。詔明瑞以將軍兼雲南總督。明瑞在伊犁未至。以鄂寧代之。

庚辰。帝還京師。

革大學士楊應琚職。命陳宏謀爲東閣大學士。兼理工部事。劉綸爲吏部尙書。協辦大學士。

四月甲寅。命各省大計。藩臬兩司。由督撫出考。

五月丙子。以觀音保。扎拉豐阿。額勒登額等爲領隊大臣。領健銳營兵二千名赴雲南。

壬辰。命玉魯斯爲領隊大臣。赴雲南。

六月己酉。命李侍堯檄諭暹羅國。嚴防緬匪竄匿。

命侍郎額爾景額馳驛前往雲南。在參贊大臣上行走。給與欽差大臣關防。

七月壬午。帝奉皇太后秋獮木蘭。戊子。駐避暑山莊。

閏七月甲寅。賜楊應琚自盡。

九月癸丑。帝還京師。

十一月。命將河員不避原籍之例。永行停止。

乙巳。命翰林院讀講學士及詹事府庶子等官。京察照四五品京堂。歸王大臣驗看。列爲等次引見。

十二月。增文職從一品階爲榮祿大夫。

丙子。湖南學政盧文弨以奏事忤旨。撤回交部嚴加議處。

庚辰。原任禮部侍郎齊召南。坐徇隱近族齊周華逆詞革職。

乾隆三十三年戊子。正月己亥。御批歷代通鑑輯覽成。

命大學士公阿里袞前往雲南。辦理軍營策應機宜。卽授爲參贊大臣。

二月。諭巴圖濟爾噶勒領隊到雲南時。著在參贊大臣上行走。

初。我師大舉征緬。將軍明瑞由木邦孟良攻東路。爲正兵。約參贊額爾景額及提督譚五格由孟密出新街水路。會於阿瓦。額爾景額尋卒。以額勒登額代之。以九月二十四日啟行。連旬雨潦。十二月二日。始出宛頂。越八日。整隊至木邦。守兵望風先遁。獲其糧。留參贊珠魯訥按察使楊重英。以兵五千守之。通餉道。明瑞自率兵萬二千。爲浮橋渡錫箔江。緬人守天生橋南岸。我師繞淺渡而潰之。數日。至蠻結。敵軍二萬。立十六柵以待。領隊大臣觀音保麾衆先據山左。哈國興等三路登山。俯薄之。一呼直逼其壘。黔兵十餘踊而入。衆乘之。敵披靡。遂拔其柵。復連破三壘。而十二壘之敵皆宵遁。大獲糧械。軍聲大振。進至象孔。迷失道。明瑞度不能至阿瓦。乃謀取道大山土司。向木邦以歸。敵悉衆來迎。我兵步步爲營。每日行不三十里。自象孔至小猛盲二千餘里之地。凡六十日始至。其中又有蠻化之捷。殺敵四千餘。明瑞休軍蠻化數日。取所得牛馬犒士。而敵之先一日過者。已柵於要路。

得波竜人引以間道。由桂家銀廠舊址而出。會敵之分路襲木邦者。已潰我木邦之師。牂珠魯訥執楊重英。於是木邦之敵亦至。額勒登額之進猛密。中途阻於老官屯之敵。頓兵月餘。明瑞行抵小猛盲。距宛頂糧臺二百里。而額勒登額之援不至。明瑞乃令軍士乘夜出。度皆得自達。而自與領隊大臣率親兵數十人。力戰死之。帝聞。命明瑞及同時殉難扎拉豐阿。觀音保俱賜優卹。逮額勒登額至京。磔之。並斬提督譚五格於市。命大學士傅恆爲經略。阿里袞阿桂爲副將軍。舒赫德爲參贊大臣。同赴滇。籌辦經剿緬匪事宜。以鄂寧補授雲貴總督。以福隆安爲兵部尙書。軍機處行走。

三月辛丑初。命將額勒登額之妻發遣伊犁。賞給厄魯特爲奴。額勒登額之叔傅衛佛爾賽。將額勒登額之妻鳩死。帝聞之。大怒。命將佛爾賽拏問。其妻發伊犁。給厄魯特爲奴。其子均監禁。又拏問原保額勒登額之散秩大臣富德。又命將額勒登額之親叔親弟姪均發伊犁。與厄魯特兵丁爲奴。其女均監禁。已嫁者離異。

四月壬申。試翰林詹事等官。擢吳省欽等三員爲一等。試由部院入翰林等官。擢巴彥學爲一等。餘各升黜留館有差。

五月。定司員改任御史奏請留部者。嗣後永行停止。

壬子。嚴禁雲南等處馬匹偷販出境。

六月。舒赫德鄂寧俱以密陳招致緬人投降一事。忤旨。交部嚴議。命阿桂補授雲貴總督。

七月癸巳。帝奉皇太后秋獮木蘭。己亥。駐避暑山莊。

八月。原任兩淮鹽運使盧見曾。以隱匿提引銀兩。私行營運寄頓。刑部擬絞監候。秋後處決。從之。

九月戊戌。兩淮鹽政高恆普福俱以侵蝕鹽引餘息。刑部擬絞監候。秋後處決。從之。

丁未。帝還京師。

民間喧傳匪人偷剪髮辮。始於江浙。漸蔓延直隸山東各處。帝以各督撫緝捕不力。高晉明德彰寶馮鈐熊學鵬永德等。俱交部嚴議。

十一月癸卯。命署戶部侍郎索琳軍機處行走。

十二月。臺灣民黃教作亂。臺灣道張珽以不親往督捕革職。

乾隆三十四年己丑。正月丁亥。命署副都御史傅顯護軍統領烏三泰。往雲南軍營。監造兵船。

命阿桂卸去總督。與阿里衮同心協助傅恆。辦理兵事。添調吉林索倫兵各一千名。

以明德爲雲貴總督。旋以阿思哈代之。

戊申。以刑部尙書官保協辦大學士。

二月丙寅。諭陣亡人員廕雲騎尉。襲次完後。仍賞給恩騎尉。世襲罔替。不准過繼之子承襲。著爲例。

四月。革前雲貴總督鄂寧職。賞給三等侍衛銜。發往雲南軍營。自備資斧。效力贖罪。以阿里袞奏其於緬人竄入戶臘撒搶掠滋事。匿不以聞故也。

賜陳初哲等一百五十一人進士及第出身有差。

臺灣亂匪黃教被擒。前臺灣鎮總兵王巍以措置乖方伏法。

六月丙辰。以錢謙益所著初學集有學集二書中。多詆謗語。命將其版片並印行之書。查出銷毀。

七月戊子。帝奉皇太后秋獮木蘭。甲午。駐避暑山莊。

八月戊寅。禁廣東私鑄唐宋元明古錢。

九月辛丑。帝還京師。

十月乙丑。命彰寶往駐老官屯。籌畫撫輯事宜。

十一月。協辦大學士尙書果毅公阿里袞卒於軍。予諡襄壯。

經略傅恆奏稱。緬酋懜駁遣人呈書。請息兵解圍。允之初。我師大破敵於金沙江。

清史綱要 卷七
乃會攻老官屯敵壘。敵豎柵自固。久之不克。柵有水門通江。阿桂撥戰艦。越柵截其西岸。應援之師。敵師乃遣人立柵上。遞緬文。請張幕適中地。親來議款。明日復以其酋。懜駁書至。阿桂集諸將議進止。皆憚水土瘴癘。爭願罷兵。阿里衮已卒於軍。經略又病足。退居銅壁關。帝諭經略班師。於是緬酋遣使十四人。賚貝葉書。詣經略饋獻方物。自陳請入貢。遂焚舟鎔大礮而歸。遷木邦孟拱蠻暮三土司於關內。分置大理蒙化寧洱。而空關外地。留副將軍阿桂於雲南。既而緬貢竟不至。

乾隆三十五年庚寅正月。帝以今年六十誕辰。明歲皇太后八旬萬壽。命自乾隆三十五年爲始。將各省應徵錢糧。通行蠲免一次。又諭各省輪捐之章。勸諭業戶。照蠲數十分之四。減佃戶租。

二月庚申。飭禁督撫指名奏請揀發。

革侍郎阿思哈職。發往伊犁。效力贖罪。因其前在雲貴總督任內。辦理軍需。心存恇怯也。

貴州巡撫良卿以飢法婪贓伏法。其子銷去旗籍。發往伊犁。給厄魯特爲奴。

三月壬午。帝奉皇太后謁陵。巡幸天津。癸卯。還京師。

五月乙未。以祈雨。命刑部清理庶獄。減軍流以下罪。

緬人來索木邦蠻暮孟拱三土司地。阿桂遣都司蘇爾相賣檄答之。緬人留不遣。
閏五月。召福建巡撫溫福來京。補授吏部侍郎。在軍機處行走。

命裘曰修赴薊州寶坻一帶捕蝗。

裘曰修以捕蝗不力。革職嚴議。

七月。大學士一等忠勇公傅恆卒。賜諡文忠。恆爲戶部尙書米思翰孫。筭機務二十三年。最承恩眷。其卒也。年未五十。帝甚惜之。一切喪葬儀節。許照宗室鎮國公例。

八月。命署兵部尙書豐昇額軍機處行走。

己丑。帝奉皇太后秋獮木蘭。駐避暑山莊。

九月丙午。命阿爾泰爲武英殿大學士。兼吏部尙書。仍留辦四川總督事。

十月庚辰。帝還京師。

戊戌。申禁宗室王公容留僧道星相人等。

乾隆三十六年辛卯。二月甲戌。帝奉皇太后東巡。

命大學士陳宏謀以原官致仕。

命伍岱爲參贊大臣。赴雲南軍營。

命劉綸爲文淵殿大學士。兼工部尙書。以于敏中協辦大學士。

丙申。帝謁岱嶽廟。登泰山。三月丁未。謁孔林。

四月甲戌。命戶部侍郎桂林軍機處行走。

乙酉。以旱。命刑部清理庶獄。減軍流以下罪。

乙未。賜黃軒等一百六十一人進士及第出身有差。

丁丑。帝奉皇太后還京師。

大學士尹繼善卒。予諡文端。尹繼善。尹泰子。四次總督兩江。前後三十餘年。頗以汲引人才爲務。

五月癸卯。命減秋審。緩決三次人犯罪。

乙巳。諭立決人犯。當省刑之際。暫緩行刑。著爲令。

副將軍阿桂以密奏大舉征緬忤旨。部議革任。仍留於軍營。在兵丁上行走。效力贖罪。以溫福代之。

諭匪犯糾衆。地方官三月以內擒捕者。免議。著爲令。

壬戌。命高晉爲文華殿大學士。兼禮部尙書。仍留兩江總督任。召阿爾泰入閣辦事。以德福爲四川總督。

六月。原任大學士陳宏謀卒。予諡文恭。宏謀爲諸生。卽以經世爲己任。聞有邸報至。必借觀之。歷官三十餘年。所到處。無問久暫。必究心於人心風俗之得失。及利弊之當興革者。分條鉤考。次第舉行。所著五種遺規。行於世。

七月戊申。帝秋獮木蘭。癸亥。駐避暑山莊。

八月。定邊左副將軍成袞扎布卒。以盟長車布登扎布代之。

九月癸卯。命理藩院侍郎慶桂軍機處行走。

十月乙亥。帝還京師。

命大學士溫福自雲南馳往四川。辦理金川事務。初。大金川酋莎羅奔死。兄子郎卡主土司事。漸桀驁。侵擾鄰境。旋死。其子索諾木與小金川酋澤旺之子僧桑格。侵鄂克什土司地。五年。索諾木誘殺革布什扎土官。僧桑格亦再攻鄂克什。及明正土司。我兵往護鄂克什。僧桑格遂與官兵戰。事聞。帝以前此出師。本以救小金川。今小金川反悖逆。罪不赦。總督阿爾泰歷載養癰。至是。又按兵打箭爐。半載不進。罷其職。以桂林代爲總督。與溫福率兵分路進討。

十二月戊辰。命溫福爲武英殿大學士。兼兵部尙書。

辛巳。命書麟領西安八旗兵二千名。赴四川軍營。

乾隆三十七年壬辰正月。諭古今來著作無慮數千百家。其令直省督撫會同學政等。通飭所屬。加意購訪。

二月丁卯。授阿桂爲四川軍營參贊大臣。

三月乙巳。以豐昇額爲四川軍營參贊大臣。

四月庚寅。賜金榜等一百六十三人進士及第出身有差。

五月辛丑。命哈國興馳驛前赴溫福軍營。

授舒常永平均爲領隊大臣。前赴四川軍營。舒常赴西路。永平赴南路。

命戶部侍郎福康安軍機處行走。

命鄂蘭海蘭察由滇入川。鄂蘭帶領長生保綏庫阿坦保利保住赴南路軍營。海

蘭察帶領額爾登布塞布騰庫伯赴西路軍營。

四川總督桂林遣兵三千進攻小金川墨壘溝。敵截其後路。桂林不赴援。致全軍陷沒。泗水歸者僅二百餘人。桂林匿不以聞。被劾。派溫福隆安前往查辦。以阿桂

代之。

己未。帝奉皇太后秋獮木蘭。六月乙丑。駐避暑山莊。

差侍郎劉秉恬往四川。辦理西路軍營糧運事務。給欽差大臣關防。

七月丁未。定道府以上等官。如有同胞及同祖兄弟叔姪。同在一省。俱令官小者迴避。

雲南布政使錢度以婪贓伏法。

八月辛卯。飭道府州縣等員。凡遇丁憂及革職者。毋得寄居原任地方。

九月甲寅。帝還京師。

丁巳。禁各省自巡撫以下。不得延請本省幕友。及流寓帶有家屬在五百里內者。並限定五年更換。

十月。以副都統華山護軍統領公興兆爲領隊大臣。赴四川軍營。

乾隆三十八年癸巳。正月。以甘肅提督馬全爲領隊大臣。馳赴四川軍營。

甲辰。已革大學士四川總督阿爾泰。以貽誤軍務。及勒屬派買短發價值。受屬員餽送。收回應扣養廉各款。賜自盡。

二月。嚴定外省官員失察子弟干與公事處分。

庚午。諭。昨據軍機大臣議覆安徽學政朱筠條奏。校覈永樂大典。已降旨派軍機大臣爲總裁。揀選翰林等官。詳定規條。酌量辦理。仍將應定條例。卽行詳議繕摺具奏。尋議上。得旨。將來辦理成編時。賜名四庫全書。

禁各省商籍人員。無得服官本土。

四月庚寅。命內閣學士博清額赴四川軍營。

命署禮部侍郎索琳軍機處行走。

五月丙寅。帝奉皇太后秋獮木蘭。壬申。駐避暑山莊。

六月。提督董天弼以擅離防次。革職拏問。

木果木大營被陷。大學士溫福死之初。我軍之抵美諾。僧桑格送其妻妾於大金

川而自赴澤旺所居之底木達。澤旺閉寨門不納。遂由美臥溝竄入大金川。我兵至底木達。俘澤旺。而檄索諾木縛獻僧桑格。不應。帝命溫福爲定邊將軍。阿桂豐伸額爲副將軍。溫福由功噶入。阿桂由當噶入。豐伸額由綽斯甲入。旣而溫福以敵扼險不得進。別取道攻苦嶺。駐營木果木。令提督董天弼分屯底木達。以守小金川之地。溫福性愎。不廣咨方略。惟襲訥親張廣泗以礮卡逼礮卡故事。修築千計。所將兵二萬餘。大半散於各卡。索諾木陰使小金川頭目等。由美臥溝出煽故降番。使復叛。諸降番蠶起應之。先攻陷提督董天弼之營。次刼糧臺。卽潛兵襲木果木。會運糧夫役數千。爭避入大營。溫福堅閉壘門不納。轟而潰。聲如壞堤。軍心益震。敵四面噪入。溫福中鎗死。海蘭察聞警赴援。殿衆由間道退出。收集潰卒。尙萬有數千。其戰沒者三千餘。小金川地復陷於敵。阿桂聞變。知必有降番內應。先擊近寨諸番。並盡收皮船。以斷隔河之敵。故一軍屹然不動。乃整隊出屯翁古爾壘。

大學士劉綸卒。予諡文定。綸在政府十年。與諸城劉統勳相得甚。有南劉北劉之稱。

授富德爲領隊大臣。帶兵前往四川軍營。

七月甲子。命舒赫德爲武英殿大學士。兼刑部尙書。

革四川總督劉秉恬職。留於軍營。自備資斧。效力贖罪。以其不能調兵駐守。設法嚴防。致木果木失陷故也。

八月戊子。授阿桂爲定西將軍。將內閣所貯定西將軍印。交兵部迅速由驛發往。先是。木果木之敗。帝召大學士劉統勳至避暑山莊。詢以一切事宜。統勳前言金川不足勞師。至是亦言兵不可罷。且力言阿桂可用。故有是命。而以豐伸額明亮爲副將軍。

命于敏中爲文華殿大學士。兼戶部尙書。以程景伊協辦大學士。

戊戌。授明亮爲定邊右副將軍。富德爲參贊大臣。在南路一同帶兵征勦。

九月丙子。命刑部侍郎袁守侗軍機處行走。

戊寅。帝還京師。

十月。革定邊左副將軍車布登扎布職。仍留親王職銜。以貝子瑚圖靈阿代之。以車布登扎布見小卑鄙故也。

十一月。阿桂以收復小金川入奏。凡因木果木失事革職留任之海蘭察富興烏什哈達成德富紳海祿。悉予開復。

大學士劉統勳卒。予諡文正。統勳嘗以尙書出視楊橋漫工。屬吏以芻茭不給爲辭。月餘尙無端緒。統勳乃爲微行。見大小車載芻茭凡數百兩。皆弛裝困臥。有泣者。問之。皆言奉示運糶料赴工。縣丞某索賄乃收。貧不能具賄。遂拋置河干。欲歸不能。統勳旋署。令巡撫卽縛縣丞至。數其罪。將斬之。巡撫爲請罪。乃杖而荷校以徇。逾月。工遂竣。其精覈能治事。率此類也。

召湖南巡撫梁國治來京。在軍機處行走。

十二月辛丑。以李侍堯爲武英殿大學士。兼兵部尙書。仍管兩廣總督事。
乾隆三十九年甲午。正月庚午。以伍岱爲四川軍營參贊大臣。

命刑部定聚衆結盟罪。

四月辛亥。以旱。命刑部清理庶獄。減軍流以下罪。

五月乙卯。命選宗室王公子入宗學肄業。著爲令。

戊辰。帝奉皇太后秋獮木蘭。甲戌。駐避暑山莊。

七月。大學士于敏中以曾向內監高雲從探問禁中消息。交部嚴議。旋將高雲從
正法。

命左都御史阿思哈軍機處行走。

九月。禁京城商民囤積米穀。

壬申。帝還京師。

山東兗州民王倫作亂。倫以清水邪教。運氣治病。教拳勇。往來山東。號召無賴亡

命。徒黨日衆。壽張知縣沈齊義捕之。遂入城戕吏。連陷堂邑陽穀。趨臨清。圖阻運道。帝命大學士舒赫德佩欽差大臣關防。由天津馳赴山東督師。倫圍巡撫徐績軍於臨清之梁家淺。旋解圍趨運河。直隸總兵萬朝興破之於運河西岸。舒赫德軍抵臨清。倫使千人北出牽官兵。而選驍悍五六百陣舊城東門迎戰。舒赫德遣侍衛音濟圖等以禁旅三百迫之北門外。而自攻東門。倫敗竄城內。音濟圖手擒之於城中大宅。爲其黨十餘人所奪。遂登樓縱火自焚死。

十月乙未。命建文淵閣於文華殿後。

諭秋審情實人犯。經十次未勾。改入緩決。著爲令。

命各督撫行保甲法。

十二月。諭諸王遞降之例。自貝勒貝子公以下。至奉恩將軍。世襲罔替。不過六七傳。朕心有所不忍。嗣後凡親王以次遞降者。至鎮國公而止。郡王以次遞降者。至輔國公而止。其公爵均著世襲罔替。

乾隆四十年乙未。四月壬寅。賜吳錫齡等一百五十八人進士及第。出身有差。五月己未。以旱。命禮部祈雨。

壬申。帝秋獮木蘭。

六月戊寅。駐蹕暑山莊。

八月己亥。定西將軍阿桂等馳奏。於八月十六日。攻得勒烏圍。小金川之復。帝命移師征大金川。敵先守那穆山。海蘭察由間道破山後之色溯普嶺。敵乃退守薩斯甲嶺。嶺之西有最高峯。敵未甚備。海蘭察率死士六百。猱引而上。比明及其礮。一湧而入。盡滅之。數十里各寨聞之。皆奪氣。遂同時破。乘勝直臨遜克宗壘。索諾木鳩僧桑格。而獻其尸及妻妾頭目。至軍。乞赦己罪。阿桂檻致京師。而攻益急。壘爲勒烏圍外障。敵以死守之。百計攻之。不入。有墨格山可進。大兵冒險克之。遂移營其地。距勒烏圍二十里。會連雨數旬。兵不得進。以七月抵勒烏圍。其官寨礮堅牆厚。西臨大河。迤南有轉經樓。與官寨相犄角。我兵四面礮轟官寨。破之。又克轉

經樓。其逸出者皆溺水死。其巢已破。莎羅奔兄弟及各頭目。已先期遁赴噶爾厓矣。

九月丁卯。帝還京師。